

東

華

錄

東華錄

康熙十五

臣王先謙敬編

臣周淪蕃恭校

康熙十四年乙卯春正月辛酉諭兵部自逆賊吳三桂耿精忠背恩反叛浙江及江西袁州贛州等處綠旗官兵奮勇剿賊固守地方深爲可嘉應卽議敘以旌其勞爾部速議具奏○浙江總督李之芳奏賊犯遂安縣圍絕金衢餉道總兵官鮑虎身先士卒敗賊於花石嶺斬千六百七十餘名生擒僞副總兵都司各一名守備千總各五名賊據分水縣都司趙得勝等殺賊三百餘復分水縣得旨嘉獎下部議敘○平南王尙可喜奏賊首黎化中陳九鼎等糾合楚逆李漢英聚眾萬餘犯連州經我兵擊敗逃遁仍復嘯聚大田頭糖塘清水等處以爲巢穴遊擊李有才等領兵進剿焚巢

賊遁楚界下部議敘○贈江南陣亡守備戚世龍官廕○乙丑諭

禮部朝鮮國王李柵襲封以來殫竭忠誠克盡藩屏之職今聞溘

逝朕心深爲憫惻可從優給與卹典於常例外加祭一次○江西

巡撫白色純奏閩逆王九萬敗遁後復犯會昌遊擊李天柱周球

等敗之於湖城陣斬千餘生擒僞副將一名下部議敘○丙寅調

李士正爲浙江布政使由福建調張登選爲浙江按察使由江西淮丁

思孔爲江南按察使由直隸守道遷○予故告病回籍內祕書院大學士

孫廷銓祭葬諡文定○戊辰諭吏部禮部兵部平南王尚可喜航

海歸誠勳猷懋著 太宗文皇帝嘉其勞績特賜王封及定鼎燕

京復能殫竭忠忱贊襄大業 世祖章皇帝知其夙篤忠貞畀以

巖疆重任鎮守粵東海氛甯靖百姓乂安近因吳三桂耿精忠等

叛逆該藩益勵忠純克抒偉畧悉心籌畫數建膚功朕甚嘉焉事

平優敘屢有俞旨前奏年老難以任事請以其子尙之孝承襲王爵已允所請今思該藩累朝勳舊功著封疆宜錫殊榮以酬懋績平南王尙可喜著進封平南親王卽令其子尙之孝襲封尙可喜以親王品級頂帶支俸示朕優眷之意廣東文武事務著尙可喜照舊料理其親王之寶亦暫行掌管尙之孝統兵在潮著給與大將軍印應行封典爾部卽遵諭行○癸酉以佟養鉅爲廣東巡撫

由布政使達

○先是王輔臣叛

上遣其子繼貞往諭至是王輔臣留

其子繼貞遣原任郎中祝表正具疏自理委罪經畧莫洛上復

命祝表正齋敕往撫敕曰前據陝西督撫奏稱入川兵丁忽爾生變念爾素性忠直朕所深知國家待爾寵渥非常必無負恩悖逆之事故特面諭爾子王繼貞前往宣布朕意恐爾尙懷疑懼又降專文於爾詳加開諭今覽爾奏變起情形皆由莫洛控馭失宜軍

心不服所致爾飲戢潰軍具奏請罪爾之心迹無他朕已洞悉往
事一槩不究前諭甚明爾所屬官兵俱行寬宥照舊歸伍效用爾
卽率領仍回平涼汛地照舊鎮守以固封疆莫洛標下原帶官員
已各免罪作何委用爾與總督酌量題補其餘兵丁願歸農者令
地方官加意安插願在爾標充伍者與總督商酌補入務令得所
以副朕撫恤之意爾前功甚茂朕之待爾終始不渝其盡釋疑衷
以圖後效果建殊勳佇膺懋賞○貝勒尙善等奏臣等正治攻具
取岳州賊浚濠三重復設陷坑木椿竹籬環布臣等欲移營前進
又恐時當霖雨江水泛漲營壘前後悉皆被水且我船與賊船甚
近而荊河口又居我後賊據上流殊爲可虞臣當暫停進兵以俟
機會報聞○江西巡撫白色純奏萬安縣乃贛南水陸咽喉之地
賊寇出沒靡常遊擊田振等敗之於西塘又敗之於韶口羅塘灣

斬獲甚眾下部議敘○乙亥遣內大臣壽特侍衛桑厄思克諭祭
朝鮮國王李柵諡莊恪封嗣子李焯爲朝鮮國王○定西大將軍
貝勒董額奏將軍席卜臣都統赫業總督周有德等進取保甯紮
營於蟠龍山分兵駐槐樹驛郿嶺接應糧運爲賊所劫糧運阻絕
十三年十一月撤回大營兵行至娘娘廟張飛廟槐樹驛屢遇賊
兵邀路俱擊敗之署前鋒統領穆占率兵通道自漢中運糧至大
兵始得食又擊敗賊於郿嶺龍潭驛等處抵廣元聞王輔臣叛復
自廣元回漢中其由東河小路撤回之二百餘兵爲賊所阻臣等
酌留官兵守漢中親統大兵出棧道途經鳳縣留兵防守至鳳翔
復量留護軍驍騎付赫業駐鎮隨率餘兵至西安但席卜臣赫業
等兵勞苦已極馬匹鎧仗不能自辦請量行撥給得旨馬匹鎧仗
行軍要需今席卜臣等兵旣極勞苦見駐西安諸將帥酌量每人

給馬二三四匹其鎧仗著動正項錢糧修辦○廣東廣西總督金光祖奏欽州遊擊王嘉賢進剿廣西逆賊周將軍黃都督等餘孽於王光山陣斬僞百總一名賊兵二百八十六名下部議敘○平南王尚可喜奏歸善縣淡水場土賊蔡宗明等竊發知縣連國柱都司陸光象擊敗之下部議敘○丁丑先是 上諭議政王大臣等蘭州近邊要地應速遣兵駐守今保甯大兵已回西安達禮善巴圖魯兵亦將至西安其將西安見在兵每佐領下撥四五名以上令將軍阿密達副都統鄂克濟哈夸代率赴蘭州剿禦逆賊並防階州文縣諸處令鄂克濟哈夸代參贊阿密達軍務尋大將軍貝勒董額奏蘭州固宜防守但保甯還卒鎧甲未備達禮善巴圖魯六兼程而來恐難驟遣西安所恃以禦賊者賴有調來汝甯河南六今將此兵發往儻王輔臣由陳倉諸路斷我棧道自秦州平涼

來信深爲可虞 上復諭曰今據報逆賊已徧蘭州若不遣兵速
援賊將猖獗臨鞏被陷三邊一搖勢難猝定蘭州距秦州不遠我
兵若往蘭州則秦州便可襲取而平涼諸賊亦可首尾夾攻阿密
達等以文到之日卽速赴蘭州保固三邊儻逆賊中道阻截卽攻
取平涼或奪路前赴蘭州其相機以行貝勒等速備馬匹器械給
保甯回兵其達禮善巴圖魯之兵亦給與馬匹以備剿禦○戊寅
江甯將軍額楚奏賊犯饒州官兵擊敗賊眾獲船隻無算下部議
敘○己卯浙江總督李之芳奏賊踞龍游蘭谿壽昌交界深山之
內三縣駐防官兵連敗之於白馬黃塘源等處蘭谿知縣楊天機
等敗賊於下盛村陣斬僞總兵一守備李和等敗賊於大堰頭仙
洞等處下部議敘○辛巳湖廣總督蔡毓榮奏南漳縣點子龍虎
等峒寨僞都司夏之琪等率兵民二千三百餘名投誠○揚威大

將軍簡親王喇布奏江南財賦重地界接諸省宜增守兵今副都統蘇朗帥蒙古兵一千守池州署副都統額思赫帥滿洲蒙古兵守蘇州臣復以蒙古兵二百協守徽州將軍華善之兵以五百赴浙江三百取饒州見駐江甯者僅蒙古兵四百臣所統兵不滿千請令將軍額楚等兵回駐江甯 上諭兵部額楚既抵江西不必引還令駐防兗州署副都統諾敏岳爾多率滿兵速赴安慶以備九江湖口窺伺之賊江南有警卽順流應援簡親王統之京師滿洲蒙古每佐領撥驍騎一名令署副都統伊巴克圖馬爾濟哈率領漢軍每佐領撥二名令副都統郎化麟率領俱赴兗州將軍查哈太統之伊巴克圖等爲參贊兵到副都統孫承祖帥兗州所駐漢軍與諾敏等會於安慶至盛京已調烏喇兵七百名駐守其更調盛京兵六百名赴京師○陝西總督哈占奏興安總兵官王懷

心敗賊於娘娘廟槐樹驛陣斬僞總兵王加玉等又至郿嶺攻破木城二座沿途連捷下部議敘○乙酉定西大將軍貝勒董額等奏興安兵變殺總兵官王懷忠臣等出示安撫仍移會前往興安副都統穆舒渾兵中途暫止 上命頒發敕諭付貝勒董額總督哈占宣諭官兵尋隨征總兵官黨塞上京告變 上諭據黨塞而奏王懷忠平日待下貪苛行事乖戾眾心不服以致激變朕以爾等曾隨征四川剿殺寇賊勦力勞苦今倉卒之變出於萬不得已非夙圖悖亂者比是以未忍加罪特頒寬典嘉與維新已降敕大將軍貝勒總督宣諭今又令總兵官黨塞齎敕明布朕意將爾等從前罪愆槩行赦宥其各歸營伍剿賊樹功以圖後效勿懷疑懼以副朕寬宥恩撫至意儻仍觀望稽遲或聽奸宄煽誘之言妄行作亂則國有明法勿遺噬臍之悔未幾哈占奏敕諭抵興安文武

各官集兵民宣讀莫不歡呼叩謝 皇恩感激思奮眾心遂定○
丙戌奉命大將軍康親王傑書奏隨征知縣姚啓聖守備何清等
敗賊於諸暨縣楓橋錢塘等村進破賊寨又破賊方懋功等於冷
水地方前後殺賊數千陣斬賊首朱得福招撫偽總兵等官四十
四員賊兵七千餘下部議敘又奏副都統馬哈達總兵官李榮陳
世凱等大敗偽總兵徐尙朝殺賊千餘復永康縉雲二縣得旨嘉
獎下部議敘○戊子先是定遠平寇大將軍安親王岳樂奏兵部
移文令臣速取長沙但江西所在賊擾人心未定臣若帥師前往
則江西兵單可慮今或進取長沙或先滅江西諸賊請旨遵行
上諭岳州卒難攻取若不速取長沙恐賊復增守備先令分兵留
守要害速取長沙至是岳樂又奏江西形勢爲廣東咽喉江南湖
廣要衝見今三十餘城爲賊盤踞且醴陵逆賊造設木城增偽總

兵十餘人兵七萬獯獯三千堅守長沙萍鄉諸處臣若撤撫饒都
昌防兵往長沙則諸處復爲賊有不撤則兵勢單弱不能長驅且
廣東諸路恐亦多阻臣欲先平江西賊寇無卻顧之憂然後分防
險要帥師前往 上諭逆賊吳三桂久據湖南奸宄乘勢竊發滇
黔川閩遂爾淪陷廣西陝西逆孽猖獗湖南一隅誠賊根蒂四方
羣寇所觀望必速滅吳三桂底定湖南則各地小醜聞風自散今
荊州兵未能渡江而岳州兵又難驟進王抵江西宜由袁州直取
長沙一以斷賊餉道一以分賊兵勢一以扼廣西咽喉一以固江
西門戶烏合之眾自當瓦解荆岳大兵即可乘機直進况甯羌告
變川賊必通楊洪二賊窺我鄖襄擾我南鄧侵我荊州後路揆其
大勢進兵湖南斷不容緩且南方卑溼延至下月霪雨連綿大兵
坐守日久不但戰馬多斃糧餉亦恐不繼是進取湖南不再計決

矣王宜將江西要地速行整理稍有就緒卽進取湖南勿得坐視致誤機會

二月己丑朔予致仕禮部侍郎查布海祭葬○辛卯 上至鞏華城月祭 仁孝皇后○江西總督董衛國奏逆賊陳益後鳩合閩寇吳明光踞山肆劫石城縣文武官弁領兵剿殺斬陳益後下部議敘○振武將軍坤巴圖魯侍衛奏鳳縣賊拆毀偏橋設兵守險所運之糧不得入守鳳縣夸蘭大嵩祝等以糧竭突圍而出又同知張亢古來自秦州稱王輔臣部下王好文等截斷棧道 上諭前員勒董額等至西安不卽隨經畧取道秦州乃由棧道進託言馬瘠竟駐漢中致甯羌告變王輔臣回秦州時又不追躡剿殺急回漢中及保甯兵旋僅留將軍席卜臣等守漢中親統大兵輒回西安知棧道險要不多設兵防致狡寇阻截俾廣元朝天等處復

爲賊據皆董額等退縮遲延所致理應解職但正值臨敵仍令董額統兵往定平涼秦州諸處勿仍前逗留留誤軍機此行令貝子溫齊公綽克託將軍阿密達署前鋒統領穆占輔之如應分兵阿密達穆占給與將軍印坤巴圖魯侍衛帥兵開棧道以進漢中鄂善哈占量留官兵守西安就近有警卽行剿滅尋董額奏阿密達鄂克濟哈覺羅夸代等將各處所調官兵與京城西安兵共撥每佐領五名二月十四日率往平涼臣與溫齊綽克託穆占達禮善巴圖魯希福赫業胡禮布等將回自保甯之兵及達禮善巴圖魯所領兵亦湊每佐領五名之數本月十九日率往秦州又撥滿兵防守潼關所餘兵合每佐領三名及鄂善所帶蒙古兵四百餘名付哈占鄂善副都統穆舒渾等守西安○丙申諭兵部陝西沿邊有路通山西汾州恐逆賊乘隙來犯授副都統鄂泰爲建威將軍

統領自盛京調來兵一千名往駐太原防守汾州等處以一等侍衛吳丹爲署副都統參贊軍事調烏喇諸處兵一千名來京○丁酉定遠平寇大將軍安親王岳樂奏護軍統領桑噶復上高新昌二縣陣斬僞總兵朱一典謝以泰等前後殺賊萬五千餘生擒僞副將守備等官得旨嘉獎下部議敘又奏招撫江西僞官二十餘員兵三千六百餘名下部議敘○奉命大將軍康親王傑書奏夸爾大張所志往省運礮位至上虞縣遇賊方懋功奮勇進剿擒殺三百餘名下部議敘又奏僞總兵馮公輔從義烏縣遁踞武義縣附近諸山署前鋒統領希福等敗之於苦竹地方生擒僞都司何處儒等遊擊田萬候敗之於郭東地方殺賊五百餘原任知縣李經邦招撫人民六千餘名並下部議敘○庚子贈四川陣亡守備熊天福官○辛丑予故戶部尙書米斯翰祭葬諡敏果○奉命大

將軍康親王傑書奏桃花嶺與縉雲偏近乃恢復處州要路耿逆
僞總兵沙有祥屯處州踞嶺險要因遣副都統馬哈達總兵官李
榮等率兵往攻毀柵而入降僞遊擊張漢舉殺賊五百餘遂逾桃
花嶺乘勝復處州得旨嘉獎下部議敘○壬寅諭秦中兵民爾等
皆朕赤子年來保固地方轉輸糧餉急公好義勞苦倍常朕心切
軫念近因入川兵變人情惶擾一時無知割辮去纓以圖倖免事
起倉卒情可矜原今特布寬典予以自新其臨鞏平慶等處文武
官員軍民人等凡有割辮去纓者一槩赦免不究官俱照舊供職
兵丁各歸原伍百姓各安生理特諭○癸卯平南王尚可喜奏逆
賊僞唐軍門犯樂昌總兵官張星耀等斬僞副將等十員擒斬千
餘下部議敘○乙巳經筵講官擬定講章學士傳達禮進呈諭講
章內書寫稱頌之言雖係定例但凡事俱宜以實如秉至誠而御

物體元善以宜民固已媲美三王躋隆一帝等語似屬太過著改奏○奉命大將軍康親王傑書奏賊從處州敗回仙居遣副都統伯穆赫林等領兵三路進正月二十五日至白水洋耿逆下僞鎮海都督林冲紮立十三營盤與我軍對壘穆赫林等親身率戰攻入第一座營盤諸軍繼進悉破賊營遂至仙居城下適賊會養性遣兵一千名同賊堅守城池屢招不降遂令署護軍參領額庫納等率兵於城西潛伏署參領齊林布等後陣助戰署參領禪拜等各架雲梯三面攻城賊不能支開西門遁伏兵阻截盡行剿殺生擒僞都督僉事朱富等獲大小礮位二百五十八座及關防軍器無算仙居既復擬分兵進取黃巖得旨嘉獎下部議敘又奏參將王國祥等破會養性下僞總兵胡雙奇於天峯寺殺賊六百餘下部議敘又奏遊擊田萬候破賊林惟仁於武義縣夏陽地方焚毀

木城追至宣平縣大王嶺有賊數千以大木城列陣對敵官兵三路夾攻破賊斬林惟魁等殺千餘級下部議敘○陝西總督哈占奏二月初五日賊犯蘭州撫標官兵通賊倡亂城陷巡撫花善奔涼州諭大將軍貝勒董額將軍阿密達等統領大兵分路速進恢復秦州平涼掃除逆賊以定三邊總督哈占周有德鄂善巡撫杭愛張德地等協守西安等處速移會將軍席卜臣等堅守漢中相機進剿並密檄提督張勇總兵官孫思克陳福王進寶等整兵固守汎地前來夾攻○丁未浙江總督李之芳奏賊踞衢州近郊僞總兵葉念帶賊兵五千於南山一帶紮營爲賊運糧平南將軍賴塔密令總兵官王廷梅等分路衝殺連勝三陣殺賊二千餘焚毀賊巢餘眾奔潰下部議敘○庚戌 上御經筵○奉命大將軍康親王傑書奏總理糧餉侍郎達都等招撫僞徽江伯王國賓僞總

兵丁鎮等五百三十餘員兵一萬四千八百餘名下部議敘○丙辰湖廣總督蔡毓榮奏賊船往來長江狡謀叵測命候補副將華禪爲岳州水師副將設兵一千五百名尙之禮爲荊州水師副將設兵一千名各爲左右二營以資防禦○江西巡撫白色純奏南贛總兵劉進寶敗賊黃土關又敗之橫嶺復龍泉縣得旨嘉獎下部議敘○是月免湖北武昌等七府去年旱災賦仍發粟賑之三月己未朔湖廣總督蔡毓榮奏叛逆楊來嘉犯南漳縣襄陽總兵官劉成龍擊敗之斬僞都司陳國俊焚賊屯糧逆眾盡遁下部議敘○陝西總督哈占奏遊擊田有禾敗賊於郿陽之華村遊擊邵一仁敗川賊於興安鎮屬紫陽路下部議敘○庚申先是貝勒察尼請分岳州每佐領兵二名發安親王軍前協定江西規取長沙湘潭會荊州岳州將軍三路並進上命順承郡王勒爾錦等

公同速議安親王岳樂參酌具奏至是岳樂奏岳州兵來則臣進
剿力厚卽守江西亦屬有益 上諭自岳州發兵至江西正值溽
暑霪雨於王進剿之期又恐無及其停止遣發順承郡王勒爾錦
等奏臣商之貝勒尙善據云江西兵已經停遣欲遣岳州兵每佐
領三名令貝勒察尼都統巴爾布率赴荊州臣俟此兵到日卽從
彝陵以下石首以上相機渡江 上諭王及參贊大臣身在地方
具陳機宜固當如議但入川大兵見以糧餉不繼退駐西安今我
兵渡江之後萬一川賊乘桴東下侵犯荊州彝陵茅麓山賊又出
襄陽諸處則我軍必致卻顧難以長驅王貝勒等皆朕懿親參贊
大臣皆朕股肱今與賊相持可進則進儻有可虞爾俟秋冬相機
進取○揚威將軍阿密達奏二月二十七日副都統鄂克濟哈等
敗賊於涇州城南擒斬偽總兵衛民舉等遂復涇州得旨嘉獎下

部議敘○甲子諭奉命大將軍康親王傑書王前奏克取處州之後酌量前進又稱貝子治浮橋戰艦將次告竣旦晚由各路征剿逆賊分兵進取黃巖今台州浮橋成否已渡江否及王進兵之事與軍中情形若何浙江事勢若何王其一奏聞尋傑書奏浙江大勢必俟舟師既至台寇已平再酌機宜共圖進取○命西安將軍佛尼勒爲振武將軍援漢中副都統德業立等守寶雞縣以疏餉道○江西巡撫白色純奏贛州賊固守老巢遊擊李天柱等分兵夾剿於黃潭地方陣斬逆渠陳魁等殺賊二千餘下部議敘○乙丑大學士圖海等奏近來供應大兵恐有派累民間雖屢奉上諭禁止有司未能實心奉行應敕督撫嚴禁一應軍需不得私派夫役不得先期拘禁征收錢糧正項外不得絲毫科歛民間詞訟除重情速審速結外其餘戶婚細事不得濫准牽累無辜並禁

衙蠹作奸指公需索土豪惡棍魚肉善良庶幾安居樂業民不知兵得旨是命速行通飭○丁卯命杭州都統喇哈達赴康親王軍前贊畫其杭州將軍印務令副都統雅塔理署並令甯海將軍貝子以下及各將軍兵聽康親王便宜調遣○戊辰安徽巡撫靳輔奏饒寇侵犯祁門逆弁趙宗鼎內變有良禾司巡檢張行健在危城中被賊偏降不屈慷慨捐軀得旨著從優賜卹○己巳定遠平寇大將軍安親王岳樂奏二月十四日定南將軍希爾根敗賊於撫州四十里塘堡地方三月初二日賊自浙江衢州來犯撫州前鋒統領侍郎覺羅舒恕復敗之七里崗下部議敘○庚午定西大將軍貝勒董額奏臣等於二月二十八日統兵至鳳翔府之隴州離隴州四十餘里地方有逆賊偽總兵高鼎等聚眾四千在關山河岸立營拒守遂同署前鋒統領穆占西安將軍佛尼勒副都統

達禮善巴圖魯分部官兵前進自己至午賊尙未退都統赫業援兵助戰合力衝擊賊遂敗遁陣斬甚多乘勝追北復關山關下部議敘○辛未以阿密達平涼失利調太原兵援陝西涇州○命都統畢力克圖爲平逆將軍帥師赴大同調察哈爾兵入駐宣府大同○乙亥諭定遠平寇大將軍安親王岳樂王輔臣作亂陝西震動逆賊耿精忠出仙霞嶺將逼衢州王抵江西日久應速滅賊進取長沙今或俟平定建昌廣信後進兵或固守諸汎地卽行前進其速議密奏尋奏擬於本月二十六日進剿建昌廣信兩處稍得就理卽進取長沙湘潭諸處○丁丑諭兵部三邊經調缺額官兵及標員宜更置者聽提督張勇募補河西兵餉著總督哈占巡撫杭愛俟道路少通速行撥解其奏報由邊外鄂爾多斯地方設站傳遞今大將軍貝勒董額等已圍秦州將軍阿密達已進取平涼

其令提督張勇巡撫花善總兵官王進寶等速取蘭州會貝勒等協力夾剿以定臨鞏等處○授甘肅提督張勇爲靖逆將軍加甘肅總兵官孫思克左都督西甯總兵官王進寶都督同知事平之日俱以提督先用○逆賊王輔臣遣賊陷定邊 上諭兵部定邊係三邊咽喉要地其令總督哈占總兵官許占魁速發官兵赴甯夏同總兵官陳福併力進取○諭兵部甯夏總兵官陳福效力屢疆勞績茂著屢次舉首逆札克篤忠貞且其妻子家屬見在川中逆賊挾誘全無顧戀矢志不移深爲可嘉著以見兼職銜升補陝西提督仍暫駐甯夏管總兵官事俟平涼地方平定之後卽赴該管地方料理提督事務陳福之弟守備陳奇妻子家口亦陷賊中深爲可憫著從優以參將升用○己卯以保守甯都恢復石城功加江西效用左都督許貞太子少保○癸未以花馬池靖邊衛衛相

繼失守命總督鄂善等各帥所部兵赴榆林協力剿禦再調四子部落等兵由甯夏榆林兩路前進速定地方○甲申子故廣東巡撫劉秉權祭葬加祭一次諡端勤○戶部議覆浙江總督李之芳奏浙省金衢台嚴紹等處賊寇屢經官兵征剿附從之徒漸已解散投誠甚多已飭行各地方官安集但不亟籌拯恤恐其別生事端應將浙省捐助銀米內酌量動支賑濟從之○乙酉廣東廣西總督金光祖奏賊犯懷集縣守備李如貴等督兵殺賊危城獲全下部議敘○湖廣總督蔡毓榮奏三月初九日襄陽總兵劉成龍剿楊來嘉偽總兵官陳宗啓等於馬良坪殺賊毀巢下部議敘○丙戌甘肅提督張勇奏西甯總兵官王進寶於二月二十三日用革袋結筏渡河大破賊眾於新城王輔臣下偽遊擊李廷玉等就擒乞敕陝督迅發大兵爲恢復平鞏之計下部議行○陝西總督

哈占奏慶陽賊攻邠州梁家堡固原總兵官朱衣客擊卻之斬僞
參將吳進忠等下部議敘○予故承恩公白文選祭葬○丁亥初
察哈爾布爾尼乘吳逆作亂謀劫其父阿布奈反日與其黨繕治
甲兵從嫁公主長史辛柱陰使其弟阿濟根告其謀 上以事尚
未露不便遽加以兵欲遣人召布爾尼兄弟以覘虛實又恐其生
疑乃奏 太皇太后遣侍衛塞梭等徧召巴林王鄂齊爾兄弟翁
牛特王杜楞兄弟及布爾尼羅不藏俱入京師已而諸王皆至惟
布爾尼兄弟不來遂於三月十七日執侍衛塞梭約二十五日舉
事長史辛柱率伊弟巴勒米特赴京奏聞從嫁公主諸人俱挈妻
子奔回錦州奉天將軍倭內巴圖魯奏報命多羅信郡王鄂札爲
撫遠大將軍大學士都統圖海爲副將軍護軍統領哈克山副都
統奕丹洪祿並爲參贊帥師討布爾尼並諭奉天將軍倭內巴圖

魯甯古塔將軍巴海等固守盛京○奉命大將軍康親王傑書奏
平南將軍賴塔等遣副都統喇哈胡圖總兵官王廷梅敗耿逆下
偽將軍馬九玉等於衢州斬級千餘下部議敘又奏官兵屢次剿
賊逆渠馮公輔敗奔於宣平縣龍坑地方嘯聚餘黨復行狂逞因
遣撫標遊擊田萬候等領兵進剿三月初三日至宣平前塢地方
賊據險以拒我兵兩路夾攻擒斬百三十餘名遂抵宣平縣城外
復由宣平馬口一路進抵大旗口馮公輔率賊眾伏於叢莽見我
兵至殊死鬪自辰至午賊始敗北上山我兵追殺十餘里沿山攀
援而上至賊大寨賊向山上修造石城一座木城二座踞守見追
兵至滾木插石礮火齊下我兵奮勇衝鋒奪隘而入前後殺賊二
千三百六十餘名擒偽都司徐之英等焚毀賊巢下部議敘○戊
子命原任大學士巴泰仍以原銜入閣辦事○以熊賜履爲武英

殿大學士由翰林院掌院學士遷

夏四月己丑朔以勒德洪爲戶部尙書由吏部左侍郎遷塞色黑爲刑部

尙書由兵部左侍郎遷○定遠平寇大將軍安親王岳樂奏招撫江西奉

新都昌冷口南湖西湖等處僞官九十一員賊兵一萬九千八百

餘名下部議敘又奏署護軍統領伯郎肅副都統朱喇禪署副都

統雅賴阿哈尼等統領官兵水陸進剿湖寇於五桂寨徐漢等處

殺賊二萬餘獲船九百餘隻復餘干縣得旨嘉獎下部議敘○奉

命大將軍康親王傑書奏耿逆下僞騎都尉連登雲由松溪龍泉

僞總兵徐尙朝由温州兩路入犯處州副都統馬哈達三等台吉

察渾及總兵官李榮陳世凱等擊敗之擒斬僞參將陳亮等四十

四員下部議敘○庚寅甯夏總兵官陳福奏叛賊踞定邊花馬二

城犯興武營遊擊熊虎等擊敗之斬僞遊擊雷普等下部議敘○

甘肅巡撫花善奏西甯總兵官王進寶兵抵蘭州逆賊出犯王進寶擊敗之下部議敘○辛卯先是布爾尼既反遣人求助於土默特貝子滾濟斯札布滾濟斯札布遣其三等護衛舍布來告上厚賚之仍令理藩院作書諭滾濟斯札布曰初長史辛柱首布爾尼負恩背叛朝廷正欲查其情實適貝子遣舍布來奏布爾尼於三月二十五日使護衛巴米說貝子同叛貝子即遣使奏聞復調兵爲擒討計朝廷深爲嘉悅今布爾尼逆狀既實貝子等可選良馬速率所部討擒逆渠厥功匪細儻馬瘦不堪馳騁亦宜各守地方大兵定於四月初六日自京啟行故豫令知之時察哈爾鄰近部落王貝勒等知布爾尼反先後遣人來報上命理藩院郎中馬喇員外郎塞冷赴諸部落調兵又諭理藩院作書如與滾濟斯札布書指○癸巳江西巡撫白色純奏屯墾都督許貞等招

撫贛南寶石寨僞弁三十二員賊眾一萬七千九百餘名下部議
敘○撫遠大將軍信郡王鄂札等啟行 上諭之曰大兵出山海

關當宣布累朝待布爾尼厚恩及朕不忍加誅之意彼若悔罪來
歸則已否則以敕書付縱還蒙古持往諭之卽布爾尼等臨陣來
降亦當保全恩養今值蒙古馬瘦爾等速往毋違諭察哈爾布爾
尼敕曰長史辛柱奏爾舉動乖戾勢欲爲亂朕初未信旣而鄰近
各旗王貝勒等相繼遣人告變朕猶疑之朕惟察哈爾遭亂覆亡
之後爾伯父額哲等受 太宗文皇帝殊恩封爲親王國家於察
哈爾不薄矣誠望爾子孫報效於世世不應及爾身而負恩叛國
也朕雖不遽以爲實但告變者接踵而至念爾必惑於奸宄之言
抑或別有不得已之故耳故發大兵來問如有別情爾可明白奏
聞朕必赦爾罪愆仍敦夙好爾受累朝恩養又爲公主所生以至

戚不忍遽滅故屢行曉諭若仍執迷恐貽後悔諭布爾尼弟羅不藏敕曰爾當開諭爾兄布爾尼令其悔罪歸誠爾等以及子孫庶不失榮貴若布爾尼不悟恐以爾兄之故併累及爾爾果能率屬來者仍待以親親之道卽以王爵封之必不食言爾爲公主子於國爲至戚故行曉諭其於大兵未至時向爾兄開陳利害速令請罪以副朕不忍遽滅之意諭察哈爾部眾敕曰爾等當向布爾尼申明利害彼若悔罪歸誠爾等亦獲福多矣朕以爾等爲 太宗文皇帝 世祖章皇帝懷柔之國不忍以布爾尼一人故遽加剿滅因此反復申諭若布爾尼拒諫不悛或擒獻逆渠或自行投降朕錫以官爵俱加恩養斷不食言往時察哈爾大臣來歸者受恩隆重爾等共知勿於太平安樂時自取禍敗時布爾尼下佐領班第喀爾喀公垂札布下護衛索納木俱以他事在京會布爾尼垂

札布反悉就拘禁 上特釋之令齎敕與大兵同往○奈曼王札

木山附布爾尼遣護衛巴地約喀喇沁多羅杜楞郡王札什同叛
誑嚇之云科爾沁十旗及札魯特阿祿科爾沁烏朱穆秦蒿齊忒
阿霸珉諸部落悉起兵相應札什歸其使以無能謝之卽具奏陳
明心迹遣其護衛達喇世入告迨理藩院員外郎圖爾哈圖奉命
至其地札什出迎具述前情且云身蒙 主恩爵爲郡王何敢同
叛若止二旗爲亂我力可支但恐應彼者果眾耳使臣不可久留
宜速回奏若出師宜從古北口行圖爾哈圖詰其故札什曰無事
多言但以是奏 皇上自能鑒察圖爾哈圖復欲詣敖漢部落札
什止之遂不果歸復屬曰途中凡有訊問者但答云我等奉旨來
召札什因其馬瘦不能赴京我等今仍回去圖爾哈圖還具陳如
札什指 上曰大兵眾多若由古北口則崎嶇難行且多帶紅衣

礮具耽延時日自應由山海關札什旣不忘國恩凡得逆渠動靜
卽令遣騎具奏進邊後馳驛速來於是賜之敕書令達喇世齋往
敕曰員外郎圖爾哈圖致王言具見悃誠王可率本旗兵固守地
方王又言大兵宜出古北口夫古北口石徑崎嶇大兵多且攜有
火器恐致稽延今仍出山海關王宜不時密探凡有動靜卽具奏
遣騎速奏○甲午轉舒恕爲吏部左侍郎調折爾肯爲吏部左侍
郎管右侍郎事由禮部調轉納布爲兵部左侍郎以郭四海爲兵部右
侍郎由內閣學士遷○乙未逆賊王輔臣遣人持吳三桂僞札印授靖逆
將軍張勇張勇斬其使以聞西甯總兵官王進寶出首王輔臣逆
書 上嘉之封張勇靖逆侯授王進寶一等阿思哈尼哈番○丙
申先是命西安將軍佛尼勒率兵開棧道進漢中至是陝西總督
哈占奏仙逸關有賊三千餘夸蘭大嵩祝等兵不滿四百難以防

禦又平隴閒亦有賊三千餘竊踞華亭 上諭仙逸關係通大兵
要路將軍佛尼勒親統官兵剿滅諸賊或令副都統德業立顏布
領兵赴剿其酌量速行○定遠平寇大將軍安親王岳樂奏招撫
江西銅鼓營強山東鄉餘千奉新等處僞官九十七員賊兵三萬
三千三百餘名下部議敘○甯海將軍傅喇塔奏三月初六日原
任廣東提督常進忠總兵官朱萬化率領水師自定海關出洋於
沈家門等處剿賊大捷下部議敘○丁酉以內閣學士徐元文爲
翰林院掌院學士○戊戌以隨征左都督許貞爲江西撫建廣總
兵官○己亥廣東廣西總督金光祖奏二月二十四日官兵復藤
縣得旨嘉獎下部議敘○辛丑以岳諾惠爲禮部右侍郎由左副都御史
遷○理藩院郎中馬喇奏喀喇沁多羅杜楞郡王札什云近奈曼
王札木山遷於察漢郭爾河布爾尼移營就之二人已合二旗外

別無叛者

上因賜札什御用盛甲以旌之○壬寅以禪塔海爲

內閣學士

由侍讀學士遷

○甲辰奈曼札木山已附布爾尼使人招台吉

鄂齊爾等鄂齊爾等遂率九佐領兵與其妻子奔敖漢尋復至喀喇沁札什遣護衛黨西喇來奏論理藩院奈曼台吉鄂齊爾等不與札木山同謀率屬來歸忠貞可嘉俟事平日札木山王爵可與諸台吉內承襲諸台吉或暫居敖漢與喀喇沁地方聽自便其奏事黨西喇從優授爲三等達爾漢世襲勿替未幾奈曼二等台吉吳勒木濟同其母率所屬二佐領兵避居土默特亦遣人來奏

上亦優旨答之○乙巳以富鴻業爲內閣學士

由翰林院侍讀學士遷

○丙

午江西總督董誥國奏袁州土賊侵犯分宜萬載二縣遊擊楊正元等擊敗之袁臨總兵官趙應奎遣遊擊潘希聖等敗賊於油木棟下部議敘○庚戌以郭丕爲左副都御史

由通政使遷

○定遠平寇

大將軍安親王岳樂奏四月初二日統兵剿賊於東鄉縣用雲梯四面攻圍仍移檄曉諭偽副將林振及偽官五十六員領十一營一萬一千餘眾繳偽印偽札投誠遂復東鄉得旨嘉獎下部議敘又奏將軍額楚等於四月初四日率兵至饒州府萬年縣之石頭街擊敗耿逆下偽都督四萬餘眾五十七營斬賊五千餘級生擒三百有餘下部議敘○辛亥諭起居注官學士傳達禮侍讀學士喇沙里朕向詣 兩宮問安爾等起居注官常隨行記注朕思昏定晨省問安視膳趨侍庭闈以盡孝道爲子孫者之恒禮嗣後朕詣 兩宮問安時侍直官不必隨行又諭日講原期有益身心增長學問今止講官進講朕不覆講但循舊例日久將成故事不惟於學問之道無益亦非所以爲法於後世也嗣後進講時講官講畢朕仍覆講如此互相討論庶幾有裨實學○癸丑甘肅巡撫花

善奏三月二十三日西甯總兵官王進寶帥師克臨洮府甘肅總兵官孫思克復靖遠衛得旨嘉獎下部議敘○陝西提督張勇奏西甯總兵官王進寶復金縣安定縣得旨嘉獎下部議敘○甲寅定西大將軍貝勒董額等奏逆賊萬餘自四川來援秦州屯於南山臣等剿禦內外賊寇兵力單薄已令副都統顏布率兵六百守隴州副都統德業立率兵六百守仙逸關將軍佛尼勒率每佐領下兵一名速來軍前請再將西安官兵酌量調發諭兵部貝勒董額圍困秦州所關最重儻秦州可慮西安亦且難保今佛尼勒雖已調至而兵力尙單除荊州調往每佐領下兵一名外或西安兵或附近汛兵令總督哈占鄂善等速撥五百名赴秦州並令總督周有德亦率所部兵星馳前來同貝勒等會剿賊寇俟擊敗川賊後貝勒等卽著分官兵赴援漢中尋又諭漢中地屬緊要不必俟

下秦州卽應發兵赴援令將軍鄂泰率駐防太原盛京兵前往
西安至日總督哈占等以西安兵內馬肥者並酌分隴州寶雞兵
俱付副都統德業立率往漢中其鄂泰建威將軍印留與署副都
統吳丹代署如吳丹與平逆將軍畢力克圖軍合則用畢力克圖
印吳丹爲參贊更自京師發每佐領下驍騎一名令署副都統一
人率赴太原○江西總督董衛國奏參將劉體君等敗賊甯都縣
參將色勒等敗賊羊石坳斬獲甚眾下部議敘○乙卯甘肅巡撫
花善奏邊外蒙古前犯洪崖堡今又乘我兵進剿河東乃拆毀關
隘襲執官吏與官兵會戰永固城副將陳達戰歿 上命甘肅總
兵官孫思克加意防邊如蒙古仍行肆虐卽率兵剿禦仍遣使往
諭達賴台吉約束部落毋爲邊患會達賴喇嘛使至並予敕書使
轉諭達賴台吉敕曰皇帝敕諭達賴喇嘛吳三桂初叛朕諭喇嘛

大兵分路進討若吳三桂勢蹙投降喇嘛其卽執送續覽喇嘛奏云吳三桂背主負國人皆惡之不來則已來卽縛之以獻吳三桂會取結打木揚打木二城今已發兵攻取防守沿邊若欲征兵深入惟候詔旨又言達賴台吉故居土伯特今遣居青海令其有事則相援無事則鈐轄其部屬朕思自 太宗文皇帝 世祖章皇帝至今遣使往來恩禮無間喇嘛崇尚信義必如所奏而行故遂以達賴台吉等進兵滇省之故曉諭兩省及達賴台吉辭以松潘路險未進四川喇嘛又奏言蒙古兵力雖強難以進邊縱得城池恐其貪據且西南地熱風土不宜若吳三桂力窮乞免其死罪萬一鴟張莫若裂土罷兵吳三桂乃明時微弁父死流賊搖尾乞降世祖章皇帝優擢封王其子尙公主朕又寵加親王所受恩典不但越絕朝臣蓋自古所罕有吳三桂負此殊恩構釁殘民天人

共憤朕乃天下人民之主豈容裂土罷兵但果悔罪來歸亦當待以不死今將軍張勇等奏達賴台吉諸部落入邊侵掠彼以王輔臣倡亂內地亦皆騷動故也今西陲晏然內地無事已下敕禁諭達賴喇嘛宜各守前言令其統轄部屬毋得生事擾民○丁巳撫遠大將軍信郡王鄂札奏臣等帥師往征察哈爾於是月二十一日次岐爾哈泰偵知賊屯達祿臣等以輕騎前進二十二日抵達祿布爾尼設伏山谷聞悉眾列陣以待臣與副將軍圖海等分布滿洲蒙古官兵進擊歷山澗賊伏發撓亂土默特兵我軍擊之盡殲焉布爾尼親領大隊擺列火器相拒我兵奮擊賊不能支遂大敗察哈爾下都統晉津率其族於陣前降布爾尼復收潰卒接戰兩次我軍乘勝衝殺連敗之斬級甚多獲馬匹器械無算布爾尼兄弟僅以三十騎遁垂札布等亦皆散走二十三日臣等聞郡主

留居瓦子府東三十里遣官兵迎歸布爾尼部下佐領五人兵三百餘名隨侍衛塞棱來歸得旨嘉獎下部議敘○參領舒什蘭奏奉調宣府左翼四旗察哈爾鎮大同眾譁毀邊牆私遁 上命散秩大臣綽爾濟杜爾麻等率入旗章京侍衛齋敕撫之曰昔察哈爾潰散時爾等祖父來歸 太宗文皇帝論功賜與世職分隸入旗眷顧撫養以迄於茲吳三桂造亂調爾駐守地方今參領舒什蘭奏爾等不請所司遽行遁歸理應治罪但先將爾入旗察哈爾調發同官兵進征今又盡徵餘兵爾等或慮妻子牲畜無人養育馬又羸瘦難以從征以此亡歸其情可恕今特行寬宥其各返故伍如常毋生疑畏昔額哲阿布奈被俘不沒入旗下爲奴封額哲爲親王所部人員亦加撫養亡國苗裔無功而施大恩若此古所希有阿布奈會有大罪又全其命以其子布爾尼襲封親王布爾

尼不思報效背恩叛逆故命大將軍信都王兵進討於是月二十
二日大破之於達祿盡殲其眾科爾沁等諸部王貝勒貝子公台
吉等俱以布爾尼罪大惡極起兵會剿恐爾等不知此情妄惑流
言陷於罪罟故特賜曉諭○戊午散秩大臣綽爾濟等奏臣等至
張家口詢關吏據云是月二十七日察哈爾兵至鄂西奚地方將
御馬廠並諸大臣牧馬人役附近旗下蒙古婦女牲口盡行掠去
及臣等至齊澇地方遣一等侍衛阿南達等前進遇察哈爾被脅
四人遂擒以歸其言亦如之臣等欲竟將敕諭送往恐此輩無知
不體 聖意將詔旨大畧錄寫卽令擒來二人齎送精奇尼哈番
阿玉席等復遣二人傳諭被掠人眾 上諭兵部察哈爾兵狂悖
如此應發兵防禦其授內大臣舅舅佟國綱爲安北將軍率兵往
鎮宣府令護軍統領傑殷副都統恰塔偕往以散秩大臣綽爾濟

杜爾麻爲署都統並預參贊○總理浙江糧餉戶部侍郎達都奏黃巖總兵官鮑虎擊敗馬九玉下僞總兵吳林等於汪家橋下部議敘又奏紹興府知府許宏勳等招撫僞總兵弓廷弼僞侯吳興賢等及兵丁五萬七千八百餘名下部議敘

五月庚申 上至鞏華城行 仁孝皇后期年致祭禮○辛酉

上回宮○撫遠大將軍信郡王鄂札等奏 上命科爾沁和碩額駙沙津率所屬五旗兵會剿布爾尼達祿之戰沙津失期未預因至札魯特境壁於貴勒蘇特會布爾尼兄弟逃奔山後知沙津兵至因使科爾沁從嫁二人送羅不藏妻並告以戰敗欲逃之故蓋羅不藏妻沙津妹也沙津於是留其妹率兵至山後圍之布爾尼豫遁羅不藏云布爾尼去矣余來乞命沙津曰爾欲乞命當招爾兄來遂遣三十騎同往羅不藏亦遁走更遣其副都統布達里潛

聞於其兄沙津兵內有孟克者追及之爲布達里刺死沙津怒身率兵追射羅不藏與布達里皆死益窮追布爾尼明日及之布爾尼十二騎併力拒戰沙津盡射殺之得旨沙津感累朝厚恩親統所屬馳追布爾尼兄弟斬之克繼祖父忠貞深爲可嘉大兵凱旋日著議敘具奏○諭撫遠大將軍信郡王鄂札等聞向日所調左翼察哈爾駐紮宣府者今毀邊牆私遁恣爲寇鈔直趨獨石口此輩或止知察哈爾變亂不知我兵戰勝察哈爾及額駙沙津射殺布爾尼兄弟之事欲往助彼未可知也其巴林翁牛特敖漢喀喇沁土默特諸路兵皆調征布爾尼其妻子在家儻叛卒經過劫掠深爲可虞今察哈爾事平大將軍等可諭令諸王貝勒台吉等率兵速回各守境內叛卒一到卽爲剿除我兵定於五月初六日速往追剿爾等其傳諭諸部知之○諭兵部本月初四日太監劉忠

傳奉 太皇太后諭旨慈甯宮內庶妃有母九十餘歲同其兄薩林地尙在察哈爾處聞之深爲憫惻軍前可弗加擄掠朕欽承

諭旨仰見 太皇太后仁慈已極敢不敬副 聖懷爾部卽速行文彼處如伊等陣亡則已或存一二或全未傷殘卽行收管其家產亦勿致散失交與內務府所管莊頭解送來京○定遠平寇大將軍安親王岳樂等奏臣等進取建昌四月二十五日抵長興賊將邵連登等率賊八萬餘水陸迎敵臣與將軍希爾根等分布官兵擊敗之斬獲甚眾遂復建昌得旨嘉獎下部議敘○揚威將軍內大臣阿密達等奏副都統鄂克齊哈等於甯州近城東山擊敗賊眾斬僞副將張三僞參將王廷譽擒殺八百餘人復甯州得旨嘉獎下部議敘○癸亥議政王大臣奏布爾尼反旣伏誅其父阿布奈見禁盛京應立斬妻郡主歸伊父安親王其子於軍前正法

女入官得旨阿布奈改爲立絞餘依議○甲子諭議政王大臣等
昔察哈爾遭亂覆亡 太宗文皇帝收集黎養編爲整旗歷有年
所今布爾尼背恩作亂實僧渾額津噶爾馬色冷輩匪類教之其
餘官民毫無干涉此皆 太宗文皇帝撫育之人朕甚憫焉凡投
歸軍前或投入鄰旗及潰散者其令大將軍鄂札副將軍圖海等
議速行收集作何贍養另奏請旨○議政王大臣等議從嫁公主
諸人經布爾尼之亂產業蕩盡請量留數戶守公主祠其餘悉令
還京內原隸入旗者仍歸本旗佐領原隸內務府者仍歸內務府
得旨義州爲邊陲要地從嫁諸人停止還京俱著披甲著長史辛
柱管轄鎮守○浙江總督李之芳奏賊屯衢郡隔河各路窺犯遊
擊高祿等敗賊於大埂余村守備李和龍等直抵上路原賊巢生
擒僞總兵繆國英等外委都司張文福等敗賊於峽口等處金協

副將牟大寅等敗賊於湯溪及周竄地方湯溪守備劉君明等敗賊於黃塘下部議敘○雲南貴州總督鄂善奏遊擊李師膺擅殺韓城縣令聚眾爲亂犯邵陽署夸蘭大鄂爾博什等擊敗之下部議敘○陝西總督哈占奏慶陽逆寇入三水縣知縣林逢泰被劫防守把總趙英四川督標隨征都司張虎臣率領民兵擊敗賊寇救回縣令保全倉庫人民下部議敘○乙丑撫遠大將軍信郡王鄂札等奏教布爾尼造亂者阿雜里喇嘛僧額渾津噶爾馬色冷布達里破翁巴達里巴呢陳特塔爾噶爾昭噶爾馬薄托和也布達里破翁巴達里巴呢塔爾此五人與布爾尼兄弟同死陳特爲亂兵所殺噶爾馬薄托和等或死或逃尙無的耗其子女皆在卓禮克圖親王處阿雜里喇嘛僧額渾津噶爾馬色冷亦爲卓禮克圖親王解送軍前候旨處分得旨阿雜里喇嘛等悉於軍前正法

其叛人妻孥賞給有功官兵未幾鄂札等奏阿雜里喇嘛諸叛逆之子及近族兄弟俱在科爾沁其僧額渾津之弟尼塔爾當布爾尼未敗卽投科爾沁卓禮克圖親王處俟卓禮克圖親王解到日俱行正法家產妻孥入官得旨尼塔爾旣於未破布爾尼之先投入科爾沁著免死勿分其產○己巳以陝西西安布政使吳努春爲太常寺卿○議政王大臣等奏察哈爾布爾尼兄弟背叛授首理應懸示額駙沙津爲國效力應行優敘邊外率兵協助之諸王貝勒貝子公台吉等俟大將軍信都王旋師之日一併議敘獻布爾尼首級之昂阿爾住爾應授爲三等達爾漢世襲罔替賞給蟒服銀幣鞍馬同來土謝圖親王之頭等護衛綽石希等亦分別賞給得旨布爾尼首級本當懸示但念係公主所生之子朕心不忍布爾尼並羅不藏俱令收葬於公主墳傍餘如議○奈曼達爾漢

郡王札木山附布爾尼作叛勢窮自縛請罪議政王大臣等議札木山法無可赦妻孥應沒入官得旨札木山束身請罪著從寬免死革去王爵仍留家口牲畜令其自給○甲戌命山西河東守道移駐平陽雁平巡道改爲守道兼管大同府屬糧餉事○先是議政王大臣等奏據貝子傅喇塔報稱侯提督常進功舟師自甯波到日令其護守浮橋卽自率兵渡江取黃巖時下風信未順舟師不能遠至恐需時日以致師老且大兵俱集貝子所故康親王兵單未能進閩今安親王恢復建昌廣信諸郡若乘機進取建甯則仙霞賊勢必分貝子應量留兵防守餘兵悉令康親王統轄規取仙霞若賊併力拒守則安親王乘虛而入建甯必破如此兩路夾攻得一路克捷便可剪滅閩賊 上命康親王安親王詳議以聞至是康親王傑書奏甯波舟師不能至台州已回定關近攻小梁

山又不能克台州兵止三千餘不宜輕調處州見有賊警金華兵力單弱似難驟進閩疆若安親王進取建甯果能分仙霞賊勢臣豈敢坐失機會按兵不前安親王岳樂奏長興賊已剿滅建昌賊亦解散見調將軍額楚副都統席布兵撲滅廣信之賊如令臣下廣信由分水關取建甯則當分兵留守建昌親統兵前進如令臣由杉關取福建卽當分兵留守廣信由杉關前進 上諭時方炎暑安親王酌留官兵固守建昌等處率大軍暫回南昌養馬俟秋涼或取湖南或攻福建候旨以行額楚席布等應速平廣信賊臨分水關陽爲前進斷仙霞後路斯時康親王卽令將軍賴塔等兵攻取仙霞或康親王兵與額楚等兵兩路並進夾攻江山縣賊寇二王宜遙爲聲勢以赴機會○陝西總督哈占奏慶陽賊眾突圍長武縣城欲劫運送涇州糧米遊擊許靖國等督率民兵保全城

池適固原總兵官朱衣客副都統覺羅夸代統兵救援滿漢大兵前後截殺逆賊大敗生擒偽副將南文炳下部議敘○贈廣東陣歿副將黃相官○乙亥以旱命大臣理刑獄○丁丑浙江提督塞白理奏賊犯天台副將秦宏猷等大敗之紫雲山參將馬化龍等敗賊慈谿斬賊渠楊四和尚等焚毀賊巢下部議敘○戊寅甯南靖寇大將軍順承郡王勒爾錦奏據都統范達禮報稱逆賊五六千絡繹來犯南漳楊來嘉洪福二逆兩路齊出臣隨畀都統宜理布討逆將軍印並遣副都統根特統兵前往旋報穀城失守又畀貝勒察尼靖寇將軍印率兵赴援 上諭既以貝勒察尼爲將軍率兵赴援卽令統轄襄陽諸處官兵速滅南漳穀城賊寇平定地方又襄陽要地宜設重兵其令汝州副都統塞格率所部兵星赴襄陽安慶署副都統諾敏副都統孫承祖各率所部兵赴汝州駐

守○己卯 上御弘德殿講官喇沙里孫在豐張英進講孟子道

性善節 上曰人性之善無分賢愚止在勉強行之董仲舒有言

事在強勉而已矣強勉學問則聞見博而知益明強勉行道則德

日起而大有功此誠爲學之要也○庚辰察哈爾左翼四旗歸順

○命將軍畢力克圖率師赴榆林同總兵官許占魁協力平定延

安諸處以護軍統領傑殷協領覺和託爲署副都統同參贊軍務

副都統恰塔鎮大同以副都統吳丹爲建威將軍鎮太原召內大

臣佟國綱回京尋延安綏德等處陷賊榆林危急許占魁請援又

遣其子許登隆至京言狀 上復命畢力克圖分兵付覺和託速

赴榆林畢力克圖率兵繼進○辛巳以孟古爾代爲陝西布政使

由郎○癸未定遠平寇大將軍安親王岳樂等奏將軍額楚等四

月初九日復萬年縣十三日副都統巴爾堪等復安仁縣署副都

統公倭赫總兵官趙應奎等屢敗賊眾於鸞石嶺白水山口等處
破賊巢穴擒斬無算得旨嘉獎下部議敘○奉命大將軍康親王
傑書奏招撫偽參謀葉存忠偽總兵韓六合等一百六十餘員兵
一萬九千餘名下部議敘○甲申靖寇將軍甘肅提督侯張勇等
奏偽總兵潘瑀偽副將會文耀竊據洮河二州番人乘隙肆掠臣
等兵至河州會文耀先遁又遣土官楊朝樑攻洮州潘瑀敗走復
洮州河州二城番人誓服歸巢得旨嘉獎下部議敘○丁亥陝西
總督哈占奏固原鎮標遊擊趙元輔等率兵赴甯州屢敗逆賊於
東河灘焦家坑等處參將楊宗道率兵敗賊於甘泉又鳳縣逆孽
句引川賊犯寶雞縣之棋盤宮天王村滿漢官兵疾趨撲滅逆賊
大敗斬偽都司李玉國等擒偽總兵劉偶三下部議敘

閏五月戊子朔諭兵部奏省巖疆重地軍務方殷靖逆將軍侯張

勇忠勤懋著謀略優長久鎮西陲奠安疆宇近復躬履行閒殫心
籌畫屢敗賊眾恢復城池志期殲滅賊渠底定秦隴朕甚嘉之凡
用兵籌餉一切機宜必須專其責任而後可以整飭軍紀齊一眾
心以收蕩平之績所屬地方總兵官有故違節制不聽調遣者許
卽指參副將以下有臨陣退縮殺良冒功者聽以軍法從事其文
官自道員以下儻有遲誤緊急軍需者會同巡撫據實題參務令
克專壯猷早奏膚功以副朕委任至意○庚寅陝西提督陳福奏
逆賊朱龍大肆猖獗臣於三月二十日自甯夏統兵駐靈武遣官
兵復惠安韋州定理三堡至興武營會合蒙古索諾慕貝勒下各
台吉兵馬圍困花馬池遣兵前赴定邊擒斬僞參將等殺敗賊眾
下部議敘○辛卯甘肅巡撫花善等奏我兵圍蘭州賊領馬步兵
千餘出東門西甯總兵王進寶按察使伊圖等奮勇鏖戰自辰至

午進東門甕城陣斬偽參將大敗賊兵下部議敘○壬辰甯南靖寇大將軍順承郡王勒爾錦等奏賊兩路出犯南漳均州與我兵對壘邇來虎渡口諸處賊船日增聞吳逆身在松滋聲言渡江與我兵戰且欲決隄水灌荊州使我岳州大兵不得援荆今吳三桂既犯荊州餘賊或犯他處亦未可料賊勢甚熾我兵力單請添發滿漢官兵赴援 上責之曰初聞吳三桂叛卽發大兵遣前鋒統領碩岱都統巴爾布護軍統領伊爾度齊率前鋒護軍日給芻秣令其疾馳巴爾布等至荊州時賊尙未至常德澧州也所率前鋒護軍每佐領下五名兵力不爲弱矣乃不急渡江耽延遲誤而常德澧州遂叛王親率大兵至荊州又不卽渡江進取致令吳三桂一至而常德等處遂爲所據都統朱滿率兵至武昌時岳州長沙猶未叛也又不急趨鎮守逍遙武昌六百里之程行逮一月而岳

州長沙又陷巴爾布等畏懦不前坐失險要使逆賊從容得據守
湖南致我兵難以攻取且糜費糧餉倍於他處究之寸步不能前
進因賊渠與我精兵相持荆岳閒而廣西孫延齡福建耿精忠遂
相繼變叛賊寇蜂起又前諭王云荆河口以內何處宜設兵防守
王疏稱賊船上下江中俱取道荆岳易以偵知俟有事之時就近
調遣可以立至今復稱吳三桂來犯荆州餘賊或從他路出賊眾
我寡特請增兵何前後舛錯一切軍機忽略至此今禁旅遣發已
多縱發亦難驟至時方盛夏賊或冒死渡江亦未可知應調附近
官兵星馳赴援今安親王復建昌大兵已回南昌江南徽州又有
滿洲蒙古兵鎮守其令駐池州署副都統蘇朗率蒙古兵一千至
武昌換兵五百速赴荆州安親王或由甯州入湖南或由袁州進
長沙其便宜以行既而簡親王喇布奏江西賊寇窺伺池州諸處

上乃命蘇叻止以蒙古兵六百行至日合武昌滿洲蒙古兵仍足一千速赴荊州○吏部題靖逆將軍甘肅提督侯張勇出首逆賊吳三桂偽劄今又恢復河州洮州爲國效力克盡忠誠應將伊子一品官廢生張雲翼從優以大四品京堂用從之○癸巳上幸玉泉山觀禾○甲午甯南靖寇大將軍順承郡王勒爾錦奏賊犯均州將軍宜理布等兩次擊敗之陣斬偽副將參將等及賊兵千餘下部議敘○理藩院題達爾扎貝子遣吳把西台吉率兵於巴牙木虎邊口殺敗逆賊又統領二十六員台吉會同榆林官兵復隴州進靖二堡下部議敘○乙未甯南靖寇大將軍順承郡王勒爾錦奏松滋縣北山吳三桂復添四營沿江一帶賊船日增恐水陸齊犯荊州彝陵亦未可定上諭荊州彝陵等處關繫緊要著將軍貝勒察尼酌量留兵令都統宜理布范達禮防守襄陽均

州南漳等處察尼親統餘軍速赴荊州再令駐防河南汝州署副都統諾敏等率所部滿洲漢軍星赴襄陽○刑部左侍郎覺羅阿範以病乞休允之○丙申予故禮部侍郎岳諾惠祭葬○以軍興停陝西乙卯科鄉試○予陝西陣亡守備王相浙江死事武義知縣徐喆官廕○江南總督阿席熙奏土賊勾引浮梁逆寇來犯婺源遊擊張元品等三路攻剿擊敗賊眾下部議敘○丁酉浙江總督李之芳奏逆賊屯紮前嶺各路賊巢互相應援臣與平南將軍都統賴塔遣正白旗參領巴雅思呼朝參將趙得勝於五月二十四日至南塘萬青前嶺等處分路衝殺擒斬偽都司千總等下部議敘○戊戌以額星格爲禮部右侍郎由左副都御史遷○己亥江西總督董衛國奏樂平諸處逆賊乘閒來犯復陷饒州上命安親王岳樂速回南昌固守疆界居中調度分兵收復饒州○壬寅以伊

圖爲甘肅布政使

由按察使遷

○癸卯撫遠大將軍信郡王鄂札副將

軍都統大學士圖海等征滅察哈爾班師凱旋 上率在京王貝

勒大臣迎勞於南苑之大紅門 上御黃幄鄂札等行禮畢諭曰

王將軍諸大臣遠行征討滅察哈爾國建立大功深可嘉悅俱著

近前行抱見禮復諭凱旋大臣章京及冒刃效力軍士以上俱進

前坐賜茶復命副將軍圖海 御幄侍坐問以戰陣之事 上曰

軍士此役奮勇效命遂滅叛國立奏凱旋朕心甚悅八旗冒刃效

力軍士以上朕欲面問遂令次第至 御幄前一 一徧問畢 上

自南苑回率在京王貝勒大臣及凱旋王大臣等詣 堂子行禮

回宮○甲辰奉命大將軍康親王傑書奏賊三路犯處州都統喇

哈達等於十八都石塘石佛嶺等處三次敗賊復松陽縣得旨嘉

獎下部議敘○乙巳左翼四旗察哈爾兵皆感 皇恩願立功自

效 上因命察哈爾兵赴河南府駐防恐其難以鈐束復令每旗出驍騎五十人副都統襲圖統領前往○先是歸併察哈爾之喀爾喀公垂札布附布爾尼反台吉託伊等率四佐領兵奔科爾沁及布爾尼敗垂札布無所歸投誠軍前議政王大臣等議昔垂札布之父根敦貧不聊生無以自立於喀爾喀納款來歸 皇上優禮之擢爲上公俾贍養於察哈爾爲附庸是以得延至今布爾尼反垂札布不卽以狀聞反附逆助戰逮敗遁無歸始率屬乞降請革垂札布爵所屬人口分給八台吉台吉託伊等既豫投科爾沁卓禮克圖王請留其職銜人口應歸何旗伏候敕旨 上命併託伊等佐領於土默特滾濟斯札布餘依議○丙午陝西提督陳福奏臣統兵會同索諾慕貝勒下各台吉兵馬圍花馬池賊朱龍等來援城內賊眾從北門出犯我兵兩路擊剿擒斬僞都司王一龍

等下部議敘○戊申轉鄂爾多爲刑部左侍郎以郭丕爲刑部右

侍郎

由左副都御史遷

○己酉以巴錫爲陝西布政使

由按察使遷

○授長史

辛柱二等阿達哈哈番其弟阿濟根拖沙喇哈番巴勒米特拖沙喇哈番品級敘首告察哈爾布爾尼謀叛功也○庚戌增湖廣荊州府江防同知○先是甯南靖寇大將軍順承郡王勒爾錦奏五月初五日賊犯穀城縣城失守提督李胡拜陷賊副將馬朗阿總兵官金世需劉文奇楊茂烈俱退走上諭穀城失守提督李胡拜陷賊副將馬朗阿總兵官金世需等並皆退奔國家軍令素嚴未嘗有此馬朗阿等何以不顧提督遽自退歸范達禮駐襄陽去穀城甚近何以事前不爲豫備臨事不相應援今當大兵四出軍令豈容寬縱貝勒察尼速勘密奏至是察尼訊鞠上聞上命斬馬朗阿以徇革金世需劉大奇楊茂烈職令擊賊自效○定遠平

寇大將軍安親王岳樂等奏副都統朱喇禪等領兵於武甯縣擊
敗賊眾斬首二千餘墮河淹死者無數生擒偽守備等都統覺羅
晝特等克新城縣生擒偽遊擊許定國得旨嘉獎下部議敘○辛
亥以王令爲廣東按察使

由驛監
道憲

○壬子定遠平寇大將軍安親

王岳樂奏將軍額楚等進取廣信沿途敗賊復萬年等縣前至弋
陽賊將蔣德宏率兵五萬以木石斷西崗橋於城北樹木柵爲九
壘僞總兵柯昇以五千人自廣信來援別立六營額楚同土默特
都統巴雅爾等分布滿洲蒙古官兵擊敗之斬賊二萬餘隨進兵
抵廣信賊已遁去遂復其城得旨嘉獎下部議敘○陝西提督陳
福奏臣率兵圍花馬池屢敗賊逆賊來化勢急遂降花馬池平下
部議敘○平南王尙可喜奏近因饒平失守逆賊朱纘率黨屯湖
寮廖雲率黨來屯白猴劫擄村寨平南大將軍尙之孝同提督嚴

自明遣兵於大埔縣地方擊敗逆賊陣斬僞參將生擒僞遊擊等連陽遊擊吳標連州知州李賁於連州大鑊古樓山小水坪石馬坪等處兩敗逆賊李化龍沈九珠等廣州府屬之龍門增城從化與惠州屬之博羅河源長甯等縣內公莊路溪鐵崗馬鞍陳禾崗諸處向爲土賊淵藪恣行剽劫今突犯龍門臣遣副將盧光明等於龍門等處擒斬賊眾八百餘招撫千餘下部議敘○陝西提督陳福奏逆賊陳彭覘知臣恢復花馬池定邊遣賊突犯靈州漢伯等堡臣檄遊擊熊飛等於大沙井灘奮勇殺賊陣斬僞參將馬騰蛟等下部議敘○平南王尙可喜奏虎門副將李印香等於碣石白沙湖等處敗賊燒燬賊船百餘隻下部議敘○靖逆將軍甘肅提督侯張勇等奏賊據蘭城自知勢危狂突西甯總兵王進寶等率兵分路堵戰賊大敗入城俘斬甚眾遊擊丁顯俊千總錢中科

奮不顧身致被礮箭傷亡得旨有事有功人員事平議敘遊擊丁

顯俊等作何恩卹著議奏○先是廣東廣西總督金光祖奏梧州

懷集知縣李雲龍積勞殞命孀婦孤兒可憫請賜恩卹部議以知

縣病故例無恩卹其有軍功者俟事平議敘得旨總督言知縣李

雲龍著有功次積勞殞命如俟事平議敘則孀婦孤兒久待可憫

其更議之於是部議李雲龍係旗人其旅櫬及家口應護送歸旗

請飭督臣給以水陸夫船再給正項銀一百兩以資孤寡後不爲

例從之○癸丑奉命大將軍康親王傑書奏參將裴天祿原任武

義知縣李經邦等於宣平武義二縣大王嶺東隴隘口上套塞下

五塘等地方屢敗賊眾招撫僞官一百三十餘員賊兵萬餘下部

議敘○乙卯以達哈他爲左副都御史由通政使遷○丙辰廣西巡撫

陳洪明奏僞總兵李梅友踞蒼梧臣遣遊擊陳汝德統水路官兵

前往斬賊千五百餘招撫偽弁三十三員焚燬賊寨二十餘所下部議敘○以軍興停湖廣乙卯科鄉試

六月癸亥諭禮部帝王紹基垂統長治久安必建立元儲懋隆國本以綿宗社之祥慰臣民之望朕荷天眷誕生嫡子已及二齡

茲者欽承 太皇太后 皇太后慈命建儲大典宜卽舉行今以

嫡子允礽爲皇太子爾部詳察應行典禮選擇吉期具奏○以莽

色爲左副都御史由太僕少卿遷○甲子定遠平寇大將軍安親王岳樂

奏將軍希爾根進取饒州閏五月二十六日敗賊於餘干二十九

日遂至饒州賊先一夕遁饒州平下部議敘○戊辰揚威大將軍

簡親王喇布奏流犯宋標逃回江西於浮梁樂平等處嘯聚賊眾

劫掠州縣安徽提督王永譽統兵征剿參將傅爾學等敗賊捨身

寺生擒宋標下部議敘○己巳貝子傅喇塔奏陸營賊將偽都督

會養性僞將軍祖宏勳下有僞總兵八人馬兵六千南自長石嶺北至三江延袤數十里連屯二十五營領水師者賊將朱飛熊僞都督張恭萬許英下有僞總兵四人水師萬餘舟三百餘泊城東十里小梁山下我兵擊殺朱飛熊於茂頭至台州甯波紹興杭州等處俱徧海濱不設水師似難取勝初得仙居卽議進攻黃巖因賊據茂平嶺黃巖路斷我兵未能前進近聞土木嶺可以間行自台州至黃巖二百里內不能行馬者四十里賊恃險故弗守今已密啟康親王濟師俟其兵至再行進取報聞○辛未定西大將軍貝勒董額奏臣於三月初四日抵秦州圍其城四月二十日賊萬餘自四川平涼來援又賊八千餘自城內突出我兵分道迎擊大敗之嗣屢戰屢捷總兵官孫思克奉調自鞏昌率兵來會賊驚懼僞總兵陳萬策率兵民出降賊將巴三剛等遁走閏五月三十日

復秦州其四川平涼來援賊兵潰遁臣等卽遣振武將軍佛尼勒內大臣坤巴圖魯總兵官孫思克追剿於禮縣西和等處屢戰大敗之並復禮縣清水伏羌西和等縣得旨嘉獎下部議敘○壬申浙江巡撫陳秉直奏大嵐山界連甯紹二府賊眾盤踞勢甚披猖紹協都司王得福副將劉天印等剿之餘賊潰散斬僞總兵魯朝全等十餘員並招降僞總督褚楚白等下部議敘○甲戌平逆將軍都統畢力克圖奏臣引兵自大同赴榆林是月初三至謝村分兵三隊令護軍統領傑殷等率之先行傑殷等乘夜進發黎明軍河上賊三千餘拒守楊家店渡口我兵鳴角盡渡賊披靡遁去翌日克吳堡縣遂趨綏德初八日遇賊於虎爾崖口復擊敗之朱龍遁走定邊餘賊出降綏德平得旨嘉獎下部議敘○乙亥甯南靖寇大將軍順承郡王勒爾錦奏賊逼彝陵兵眾舟多又於虎渡口

諸處轉運糧餉火器宜急斷其運道但斷水路必須戰艦今荊州
止存沙唬船四十艘不足備用 上命大將軍貝勒尙善發岳州

戰船四十艘速赴荊州○丙子靖逆將軍甘肅提督侯張勇等奏
自逆賊叛變以來土官楊朝樑及子楊威矢忠報國率本部土兵
併各族土官趙宏元督承福等勦力助戰於階州鞏昌臨洮岷州
屢敗賊寇功績最著下部議敘○丁丑先是平南王尙可喜等奏
海澄公標下遊擊黃藍來請援兵臣卽與將軍尼雅翰議發滿漢
官兵赴援尋原任總兵官黃芳泰來言海寇圍漳州臣思潮武未
克闖賊方張目下在在需兵更有意外之虞勢必至於束手請就
近速調兵來援廣東 上命安親王於每佐領下發滿兵一名令
副都統一人率赴廣東至是將軍尼雅翰奏粵東四面受敵廣州
兵少平南王又漸衰邁臣才識短淺設鄰近有警恐難支守乞令

見在江西護軍統領桑遏率兵前來總統兵馬粵東可保無虞

上諭桑遏仍留江西所發每佐領兵一名前鋒統領覺羅舒恕率

赴廣東同將軍尼雅翰商酌以行○戊寅 皇子長生生○己卯

四川總督周有德奏本月十八日關山賊遁 上諭漢中要地應

速發援兵今秦州關山既復著大將軍貝勒董額酌撥每佐領下

兵一名或二名令大臣一人率往應援席卜臣等兵其貝勒等兵

或約將軍阿密達兵夾攻平涼或先剿川賊速議以聞尋董額奏

撥兵一千五百名付將軍佛尼勒同副都統德業立拉布忠等開

棧道援漢中副都統翁愛率西安兵同綠旗兵守龍州仙逸關諸

處都統海爾圖等運紅衣礮至平涼○庚辰 上幸南苑行圍○

以舒淑布爲甘肅按察使庫爾哈爲陝西按察使俱由郎中遷○壬午

靖逆將軍甘肅提督侯張勇等奏臣等圍困鞏昌逆賊王輔臣遣

僞副將任國治等領兵三千由鞏昌東門潛入內城僞總兵陳科
鄭元經等率賊六千四門分出直衝我營臣等率副將劉宣聖等
奮勇剿殺斷絕歸路斬賊甚多生擒四百七十餘人遊擊張大選
追賊逼城礮傷殞命下部議敘○陝西提督陳福奏臣會同古魯
台吉等率領官兵恢復輒井安邊地方得旨嘉獎下部議敘○癸
未 上還宮

東華錄

康熙十六

臣王先謙敬編

臣周澍蕃恭校

秋七月庚寅諭吏部兵部逆賊耿精忠負恩附逆煽惑閩疆荼毒生靈罪惡重大伊兄弟族人律應不赦但念其祖耿仲明於太宗文皇帝時航海歸誠效力行間著有勞績伊父耿繼茂在世祖章皇帝時亦效力行間鎮守邊陲耿精忠雖行同禽獸孤負國恩伊弟耿昭忠耿聚忠及族人等道途遠隔實未同謀竟爾株連朕心不忍其概從寬釋所有官職悉令如故以昭朕矜全之意○敕諭王輔臣吳三桂爲逆人心驚擾懷疑瞻顧者多惟爾知守臣節出首逆書遣子王繼貞入奏朕甚嘉之是用錫爾世職官爾子卿貳以勵忠悃後經略莫洛率師進蜀調遣失宜變生倉卒爾被

偏脅陷於叛亂朕聞之未忍加誅卽遣爾子往諭蓋謂爾封疆舊臣屢受國恩自當悔禍來歸不意爾反生疑畏竊踞如故殊負朕至誠惻怛之懷近大將軍率諸將已破秦州蜀寇相率敗遁平逆將軍又取延安蘭州鞏昌以次底定大兵雲集平涼滅在旦夕但平涼兵民皆朕赤子克城之日必多殺戮以爾之故而驅民於鋒鏑朕甚不忍今復敕爾自新若果輸誠而來豈惟洗滌前非兼可勉圖後效爾標下官兵及地方文武吏民諸當坐者概行寬宥並赦拘留祝表正之罪朕爲百姓主務期保全以靖民生慎勿愒吝自干天討負此殊恩雖悔曷及爾其欽哉○陝西總督哈占奏將軍畢力克圖統兵進剿延安南川賊遁復延安府得旨嘉獎下部議敘○丙申甯南靖寇大將軍順承郡王勒爾錦奏僞將軍張以誠王會等勾連楊來嘉犯南漳都統宜理布會同總督蔡毓榮奮

勇鏖戰陣斬三千餘級下部議敘○癸卯西甯總兵官王進寶奏賊踞蘭州官兵環攻糧運路絕造木筏百餘將渡河遁臣沿河設兵邀擊知賊計窮力竭隨遣官宣諭招撫僞總兵趙士昇及原任布政使成額於六月二十七日率僞官百餘員兵丁五千餘名以城降安插本城居民萬餘恢復蘭州得旨嘉獎下部議敘○甲辰諭定西大將軍貝勒董額等國家仰荷 天眷秦州鞏昌蘭州等處漸次恢復朕甚嘉悅此係保甯還旆之兵間關跋涉勦力效命所致須不時存念恤其勞苦非緊要必節其勞無大過則寬其罰且爾等將兵在外事情經練頗多必能同寅協恭折衷而行斷不徇一己之利但相隔遼遠慮所及不得不爲告誡秦地實爲形勝要區今張勇等將軍提督總兵及投誠兵眾雲屯一處將軍張勇勞績甚多恐貝勒等藐忽視之生彼憤懣時廬朕懷貝勒等既

效勤勞底定秦省務期克奏全功以慰朕望○西安將軍穆占奏
臣奉大將軍董額令赴援鞏昌卽同總兵官孫思克於六月二十
五日抵鞏昌遣投誠官陳萬策謝輝等入城曉諭僞總兵陳科等
率眾降計馬步兵四千九百餘名民兵五千六百餘人安插居民
十三萬五千有奇恢復郡城得旨嘉獎下部議敘○乙巳平逆將
軍都統畢力克圖奏臣自綏德州進取延安令護軍統領傑殷等
分隊前進逆賊李士英等聞風遁復遣參贊軍務副都統覺和託
率兵追襲於宜川等處大敗之六月二十九日入延安城出示招
撫恢復延安府屬膚施保安安塞宜川延長安定等縣得旨嘉獎
下部議敘○陝西提督陳福奏臣同貝子達爾札及各台吉郎中
額業圖領兵自花馬池起程於閏五月二十九日至定邊城下掘
濠圍困逆賊朱龍自綏德來援我兵於沙家澗掩殺擒獲朱龍父

子定邊僞副將倪光德等聞風膽落賊徒王衷銛等鼓譟開門脅令倪光德等出降當卽訊明將朱龍父子倪光德等梟示軍前並招撫官員兵民等恢復定遠城池得旨嘉獎下部議敘○丙午定遠平寇大將軍安親王岳樂奏臣以建昌旣克欲平附近餘孽令都統覺羅晝特等於六月二十五日攻石峽因天氣暑熱人馬疲渴賊伏兵四起我軍陣亂奔卻署副都統雅賴等戰歿覺羅晝特等收軍保新城下部察議○上以叛逆王輔臣再疏陳奏有

皇上念及兵民概從寬宥但如何安撫天語未及在事兵將未免瞻顧等語特諭諸將曰前頒敕諭炳若日星且秦州等處投誠官兵已安插得所逆賊王輔臣豈不知之若果歸順當遣伊子王繼貞或標員齎奏乃概不遣發而本內詞語又復驕倨明係借端推諉希冀緩兵著將軍侯張勇速赴秦州會同大將軍貝勒董額等

酌量留兵防守秦鞏等處速行進取平涼將軍畢力克圖統領官兵速往會將軍阿密達軍前都統海爾圖等速運紅衣礮赴平涼仍固守隴州斷賊後路○己酉陝西總督哈占奏興安遊擊王可成等復叛總兵官黨塞及道臣興永朝奔赴西安請移潼關綠旗兵守商州遣臣標綠旗兵守舊縣關及于午太乙二谷分撥省城滿洲兵守潼關總督鄂善巡撫張德地停赴延安畱守省城得旨先因將軍畢力克圖自延安往會將軍阿密達軍前延安等新復之地安撫殘黎保固疆土事極繁要故遣鄂善速往今省城見有副都統德業立等兵鄂善等至今未行殊屬不合諭到仍著鄂善等速赴延安與安兵既叛潼關要地應檄駐守太原將軍吳丹分兵赴潼關同夸蘭大鄂爾博什等固守餘悉如議○庚戌定遠平寇大將軍安親王岳樂奏定南將軍內大臣希爾根護軍統領桑

過副都統碩塔穆森穆承格總督董衛國等招撫江西泰和龍泉
永新廬陵等縣並湖廣茶陵州永興等縣僞官二百七十餘員賊
兵及家口六萬五千六百餘名又報希爾根領兵於碣碑浦景德
鎮屢次敗賊擒斬僞副將參將以下十餘員賊兵八千餘級生擒
四百餘眾復浮梁樂平二縣前鋒統領侍郎舒恕總兵官許貞等
領兵敗賊於宜黃復宜黃崇仁樂安三縣得旨嘉獎下部議敘○
壬子廣東廣西總督金光祖奏總兵官祖澤清以高州叛得旨鎮
南將軍尼雅翰見統兵駐廣東前鋒統領舒恕亦率兵前往著尚
可喜尼雅翰金光祖等會商剿禦毋使賊勢滋蔓仍嚴飭沿邊將
弁固守地方金光祖又報臣親統官兵於六月二十三日抵梧州
賊兵二萬餘水陸充塞會同撫臣陳洪明副都統尚之瑜順德鎮
總兵官張偉等分軍擊敗賊眾斬首三千餘生擒僞都司以下二

百餘名下部議敘○癸丑靖逆將軍侯張勇奏夷情叵測久蓄侵犯內地之心今聞大草灘帷幕滿野麾逐不去實因臣奉命東征乘虛窺伺乞許臣回駐莊浪以便兼轄得旨秦州鞏昌蘭州諸處雖次第恢復而底定全陝惟在速取平涼逆賊王輔臣一日不滅則秦省百姓一日不安將軍侯張勇應同大將軍貝勒董額等會商速定平涼不宜回駐莊浪如夷人果顯然作惡擾害邊民卽令總兵官孫思克回甘州防禦

八月丁巳授陝西提督三等阿思哈尼哈番陳福爲一等阿思哈尼哈番以出首逆賊王屏藩逆書故也○戊午陝西總督哈占奏前聞將軍席卜臣等兵出漢中屯洋縣隨遣人偵探據報席卜臣果離漢中但不知歸自何路臣已知會大將軍多羅貝勒等一面檄將軍佛尼勒停止進兵 上諭佛尼勒分兵六百與駐守寶雞

副都統阿爾瑚兵共爲一軍令阿爾瑚統轄嚴防棧道諸險要餘
著佛尼勒鄂泰等領至西安如得席卜臣等路確信卽以兵往迎
大將軍貝勒董額等見統大兵駐秦省作何接應席卜臣等與總
督哈占等籌度以行○己未陝西總督哈占奏興安叛兵已與蜀
寇合攻陷舊縣關將徧西安南山羣盜又分出各口乞敕大將軍
貝勒董額將軍畢力克圖等速發兵應援見駐河南副都統龔圖
亦乞遣至 上切責之曰始王輔臣叛朕以蘭州要地關繫三邊
令哈占發兵鎮守哈占稱西安要地不便分兵致蘭州諸處淪陷
三邊搖動繼哈占復以西安要地屢疏請兵因將荊州大兵陸續
調赴西安遂致荊州彝陵兵力單弱又延安爲諸路要衝會命鄂
善周有德等駐守哈占又誑奏鄂善等兵少畱之西安致延安陷
沒哈占封疆大臣每當議事不一體籌度但於己身所在常欲重

兵自衛不求速定地方貽誤非小今又稱叛兵與蜀寇合欲分諸將軍兵悉赴西安是哈占但知有西安置他處於度外矣且蜀寇何能便與興安叛兵合卽至西安不過因諸將齊赴平涼故爲聲揚欲亂我軍心分我兵勢耳諸將當益急攻平涼勿得稍緩王輔臣未滅西安潼關亦宜增兵勦禦近理藩院郎中胡什巴調蒙古兵赴太原將軍吳丹可率所部兵速赴潼關與根特鄂爾博什等協守又蒙古鄂爾多斯土默特兵見駐榆林著理藩院員外郎拉篤祜率此二部兵速赴西安若鄂爾多斯兵必不可行卽畱與總兵官許占魁等駐防榆林○辛酉戶部禮部遵旨議覆耿聚忠旣畱額駙職相應支俸嗣後凡公主郡主薨逝後將額駙原俸仍准支給從之○癸亥 上幸南苑行圍○戊辰 上還宮○辛未陝西提督陳福奏臣同副將太必圖統兵前赴平遠擊敗賊眾擒斬

僞官二十二員賊二千餘下部議敘○壬申 上奉 太皇太后

幸湯泉○癸酉陝西提督陳福奏副將太必圖等擊敗賊眾斬僞

參將陳起元等復平遠所得旨嘉獎下部議敘○甲戌 上還宮

○己卯予故致仕保和殿大學士衛周祚祭葬諡文清○敕諭耿

精忠爾祖父宣力累朝勳猷茂著俾世襲王爵格外加恩逮爾父

病歿令爾襲封仍鎮閩疆方謂爾克紹前猷殫忠報國不意爾反

爲吳逆狡謀所惑蹂躪土地戕害生民朕猶念爾父前功終不忍

絕將爾在京諸昆弟及所屬人員概行寬宥給還官職恩禮如常

今大軍雲集時勢昭然爾自知之朕復念爾變亂必有所由或爲

逼迫所致故復敕書遣爾弟耿聚忠齋至軍前明諭朕意爾若卽

悔罪率眾歸誠當復爾王爵仍舊鎮守所屬人員職任俱各如故

兵民人等照前安插儻能勦除海寇共奏膚功仍優敘加以爵賞

前使臣周襄緒等不遵之歸或別有故朕不介意朕以誠心待天下斷不失言爾勿聽信煽惑之言終懷疑懼負朕始終保全至意○陝西總督哈占奏招撫逆賊朱龍裔從僞文武官六十餘員民人二萬三千有零下部議敘○辛巳奉命大將軍康親王傑書奏將軍貝子傅喇塔遣副都統紀爾他布等自土木嶺進兵於半山嶺大敗賊眾乘勝進指黃巖賊將會養性等棄營據黃巖拒守傅喇塔等進兵圍其城會養性乘夜突圍走溫州餘賊開門降遂復黃巖得旨嘉獎下部議敘○甲申 上御經筵

九月丙戌朔靖逆將軍甘肅提督侯張勇奏甘肅總兵孫思克領兵進剿平涼於紅寺兒大敗賊眾生擒僞守備等復靜甯州得旨嘉獎下部議敘○丁亥鎮西將軍席卜臣奏本年二月兵糧匱竭取食賊麥至七月食盡十七日自漢中出沿路擊賊八月初六日

至西安見在官兵俱無馬匹器械難以前進諭席卜臣等兵自漢
中出沿途擊賊馬匹器械俱盡著陝西督撫動正項錢買馬人給
一匹並整頓器械令其鎮守西安○戊子 上幸湯泉駐蹕昌平
○定西大將軍貝勒董額奏王輔臣啓臣云前疏未奉 聖旨乞
頒赦午門仍遣威望大臣受降 上諭前屢降諭旨王輔臣果悔
罪來降悉赦其罪王輔臣安有不知且先遣祝表正尙未歸豈宜
復遣大臣彼乞降詐也特緩我師爲苟延日月計耳爾等急宜攻
取平涼若王輔臣投誠免其誅戮再行請旨慎毋因其詐言以誤
攻取之機若不投誠爾等以朕恩赦王輔臣而彼不悔禍歸順之
意布告官吏軍民使知舉兵誅亂之故○己丑 上詣明長陵率
諸大臣致奠仍遣官分奠諸陵○庚寅 上還宮○壬辰封管轄
科爾沁右翼五旗額駙沙津爲多羅貝勒○癸巳 上如湯泉迎

太皇太后○甲午定遠平寇大將軍安親王岳樂奏江西督標
遊擊周志新率兵復靖安縣得旨嘉獎下部議敘○定西將軍貝
勒董額奏臣及平逆將軍畢力克圖揚威將軍阿木達之兵俱於
八月十五日抵平涼逆賊出城迎敵我軍屢敗之斬偽總兵郝天
祥下部議敘○丙申 上奉 太皇太后還宮○諭大學士索額
圖頃見修治道路太平莊路傍民間墳墓有修平者殊爲不合著
交該部察議具奏○詔所司守護故明陵寢○定遠平寇大將軍
安親王岳樂奏俟內大臣希爾根軍自饒州至創擊石峽逆賊殲
貴溪諸寇撥兵守要地得便卽進取長沙 上諭賊渠吳三桂也
今不早滅雖江西福建之賊盡除於事奚益安親王岳樂其量撥
官兵固守江西乘冬月速取長沙大兵進長沙後諸賊乘間竊發
恐江西危殆其令簡親王喇布率江南兵二千赴江西以內大臣

希爾根爲副將軍與簡親王協同鎮守副都統額赫納率在兗州
盛京烏喇兵一千速赴江甯至卽以兵付副將軍哈爾哈齊令駐
守江甯伊從簡親王往江西參贊軍務布顏赴兗州用鎮東將軍
印管轄蒙古兵尼滿爲署副都統赴江甯參贊哈爾哈齊軍務署
副都統額思赫赴池州○辛丑給事中彭之鳳奏請照順治十七
年例正月停刑刑部議例無正月停刑之條應不准行得旨正月
停刑著照順治十七年例行○壬寅定西大將軍貝勒董額奏王
輔臣報書言彼所遣官王起鳳赴省已逾兩月尙未遣還故士卒
皆懷疑畏乞 皇上再赦王輔臣並所屬官兵之罪仍令駐守平
涼遣王起鳳還則彼無不傾心來歸今大兵僅足圍平涼不能堅
密儻賊勢窮突圍難保王輔臣不脫去也 上責之曰逆賊王輔
臣誘我緩兵其計顯然貝勒董額不速率兵勦滅反請寬宥其罪

若免王輔臣罪仍令駐守平涼假使川賊侵秦州興安賊逼西安我兵勢必分路進剿當此之時貝勒董額能保其不乘隙復叛耶今大兵雲集已困孤城乃云賊勢窮突圍難保其不脫去蓋恐王輔臣他日潰遁故設此詞豫爲之地耳若王輔臣果難圍困剿滅何以貝勒董額不與貝子公參贊諸臣合詞以請觀此獨貝勒董額一意專主招降也貝子公參贊諸臣皆朕所倚任若灼見城不可圍寇不可滅何以不將情事陳奏諸凡惟貝勒董額退縮之意是從至今不攻取城池尙復何待行軍重事豈徒付之貝勒一人耶貝勒貝子公參贊諸臣等速行圍城務期剿滅逆賊王起鳳著遣還平涼○癸卯靖逆將軍甘肅提督侯張勇奏王輔臣叛亂隨征官脅從者多惟副將高鼎於我兵圍鞏昌時先遣人通信今復率眾奪門來投軍前得旨嘉獎下部議敘○乙巳子故文華殿大

學士對喀納祭葬諡文端○戊申先是布爾尼叛命信郡王鄂札等討滅之餘黨散附各部落者頗多至是遣理藩院侍郎博羅特等於義州錦州等處安插諭曰今時屆嚴冬逃散人丁戶口加意移來安插務令得所以副朕柔遠至意○癸丑奉命大將軍康親王傑書奏八月十一日耿逆僞將軍馬九玉下副將李廷魁等率賊數千屯衢州府北元口山上斷我糧道平南將軍都統賴塔等攻賊木城圍其三面乘夜攻擊至天明衝入賊敗走官兵追勦斬獲甚眾木城俱毀賊犯江家山之營平陽總兵官王廷美大敗賊眾下部議敘

冬十月乙卯朔轉明珠爲吏部尚書

由兵部轉

○庚申甯南靖寇大將

軍順承郡王勒爾錦奏賊將楊來嘉等分道入寇命將軍噶爾漢自河南帥師赴襄陽仍畱兵防守河南○陝西總督哈占奏逆賊

王輔臣之黨王屏藩犯秦州敕陝西諸將固守要地○壬戌 皇

子萬黼生○調塞色黑爲兵部尙書由刑部調○癸亥奉命大將軍康

親王傑書奏甯海將軍貝子傅喇塔率署前鋒統領吳木篤等自

黃巖進取溫州敗逆賊於上塘嶺復誘至小河渡大敗之生擒僞

官三十五名賊兵五百餘復太平樂清青田三縣及大荆磐石衛

得旨嘉獎下部議敘○陝西總督哈占奏興安叛賊渡江將出大

峪口 上諭大峪口去西安最近若調兵遠地慮稽時日爾等將

還自漢中之兵簡精銳者遣守大峪口西安要地宜增兵防禦未

幾將軍吳丹等又奏賊犯商州舊縣關命調將軍噶爾漢所畱河

南府兵馳赴潼關復發京師禁軍令參將胡什霸勒布統之往駐

河南府○甲子安遠靖逆大將軍貝勒尙善奏長沙岳州如唇齒

相依若偏攻一隅未能猝拔今安親王進兵長沙岳州亦宜攻取

但兵尙少乞濟以河南山東諸兵 上諭尙善前奏岳州逆賊浚濠樹椿竊據甚固不能攻取故將岳州兵分遣荊州諸處並非輟岳州之攻也頃尙善等報岳州賊黨吳三桂已撤往彝陵今計我兵之在岳州者雖減於舊而賊勢亦分誠能進取岳州兵力亦未爲不足尙善又請添兵不合作何攻取尙善酌量以行○丙寅

上啓鑾謁

孝陵○贈陝西死事守備劉世英官○丁卯敘平

察哈爾功賜大將軍信郡王鄂札黃金一百兩白金五千兩給副將軍都統大學士圖海一等阿思哈尼哈番護軍統領哈克山副都統吳丹洪世祿署前鋒統領達克薩哈夸蘭大扎木素等俱量給世職○戊辰 上謁 孝陵○辛未 上詣 孝陵致祭回鑾○壬申陝西提督陳福奏九月二十三日平涼賊奄至固原固原賊亦自城內突出齊犯我軍遣副將太必圖率兵擊之方與賊戰

中衛副將賈從哲忽退遊擊張元經亦率兵走眾軍驚擾太必圖陣歿臣與副將來塔等於二十八日回至靈州 上命卽於軍中斬賈從哲張元經以徇又諭固原賊眾城守甚堅今川賊又入平涼應速遣兵勦禦鄂爾多斯兵已遣回不便復調調駐大同兵及神木歸化城兵令副都統怡塔員外郎拉篤祜領之或由延安或由定邊速赴固原此兵旣到陳福卽率本標兵或先定固原或會大將軍貝勒先取平涼與怡塔拉篤祜酌行大同兵旣往固原郎中胡什巴分太原蒙古兵五百名赴大同駐守○甲戌增工部節慎庫郎中一裁舊有司庫二筆帖式一○諭兵部頃大將軍貝勒董額等報興安賊眾犯商州大峪口川賊譚宏救平涼皆因王輔臣未滅我兵俱集平涼故諸賊乘隙侵犯欲分我兵力以援王輔臣今董額等官兵至平涼日久自宜作速攻取設使平涼未破

而四川與興安之賊俱至大兵往來路阻後雖恢復平涼亦復何益若平涼破王輔臣滅則賊應援之念絕而窺伺商州之計亦沮陝西可無虞矣由平涼南山俯視城中甚悉若據南山放紅衣礮城中賊眾自不能支董額等速奪南山以取平涼可也尋陝西總督哈占奏慶陽賊已就撫王輔臣遣黨周養民率兵圍困慶陽復陷上諭議政大臣等具勒董額到平涼日久兵力不少惟有安坐不即攻取以致逆賊王輔臣分兵救固原今又遣兵援慶陽董額及參贊諸臣不邀擊賊眾賊任意四出若罔聞知平涼賊勢既分又不乘虛攻取伊等擁大兵於平涼所司何事及今不取更待何日也若仍頓師不進必致我兵漸疲糧儲空耗賊益窺伺間隙蹂躪地方甚屬未便董額等其公同籌畫速取平涼剿除逆賊○

乙亥

上還京師○丁丑轉吳達禮爲禮部尙書

由工部轉

○陝西總

督哈占奏慶陽一郡官兵士民先雖被脅從逆今原任知府王文紳守備路調鼎等經臣招撫卽率眾獻城歸順並擒僞總兵南一元等安插士民三萬餘人下部議敘○辛巳遣署副都統穆承格參贊鎮南將軍舒恕軍事○壬午以常鼎爲工部尙書由禮部左侍郎遷

十一月乙酉朔講官傳達禮請旨舊例冬至以後輟講

上諭天

氣猶未甚寒仍令進講○先是 上諭靖逆將軍甘肅提督侯張勇陝西重地凡平定地方埽除賊寇惟爾是賴今大將軍貝勒董額雖攻圍平涼而逆賊王輔臣嬰城死守恐稽時日又川賊已過昌甯驛來援平涼我兵若不速滅王輔臣則陝西不能卽定爾量畱官兵守鞏昌親自率兵赴董額軍前協力進取平涼若鞏昌必不可離多發標兵往平涼以助攻戰並宜設策截川賊來援之路至是張勇奏逆賊吳之茂率眾進屯單家河等處臣若赴平涼恐

賊乘虛直犯臣斷不可遠離鞏昌且官軍皆已分遣諸處臣兵單實無可發下議政王大臣等議尋議應如張勇所奏固守鞏昌秦州等處相機剿禦從之○以郎廷相爲江西巡撫原任河南巡撫○改陝西固原道爲整飭平慶道駐平涼管驛鹽事○陝西提督哈占奏十月二十三日副都統鄂秦於益門鎮擊敗賊眾招撫僞總兵任德旺等下部議敘○丁亥都統海爾圖以運礮屯夫俱逃請發槍手步軍四百名綿甲人八百名防護又以礮屯熟練者少請於八旗滿洲漢軍內擇素習者遣發赴軍大將軍貝勒董額以聞上切責之曰貝勒董額等抵平涼爲日已久不速滅賊及命用礮攻平涼海爾圖又託故具奏遷延時日董額等並不議可行與否但據啓以奏殊爲不合前送紅衣礮撥漢軍每佐領二名海爾圖謂不足又添撥一名及海爾圖去時藉口沿途養馬不速行至關山

又請兵二千復如所請添發究不能開通關山今令用紅衣礮急
取平涼海爾圖復請自京師發槍手綿甲人耽延時日有誤軍機
殊負任使著解參贊之任董額等仍遵前旨速定平涼○戊子鎮
西將軍席卜臣奏副都統德業立等於十月二十七日在大峪口
擊敗賊眾下部議敘○庚寅諭吏部禮部世職官員以下有頂帶
官員以上陣亡無承襲子嗣銷去所製給與祭葬著爲令○壬辰
增湖廣仙桃鎮同知一○癸巳轉額星格爲禮部左侍郎以伊桑
阿爲禮部右侍郎由內閣學士遷○甲午甯南靖寇大將軍順承郡王勒
爾錦等奏將軍貝勒察尼等於十月二十日敗吳逆賊黨於興山
縣復其城得旨嘉獎下部議敘○丁酉揚威大將軍簡親王喇布
奏安親王已分每佐領甲兵十名進征湖南江西止畱每佐領十
名分駐建昌等處省城止餘每佐領二名今欲勦賊兵難調集欲

分守兵又不足乞將在江甯烏喇及盛京兵發來江西 上諭江
南重地烏喇盛京兵不宜調往江西見有每佐領甲兵十名又南
昌饒州建昌廣信吉安等處皆添設綠旗官兵已足調遣大將軍
酌量緩急度可緩之處調官兵以資戰守○復設詹事府衙門設
滿漢詹事各一兼翰林院侍讀學士少詹事各二兼翰林院侍講
學士左右春坊庶子各二兼翰林院侍讀侍講諭德各二司經局
洗馬各一俱兼翰林院修撰左右中允各四兼編修左右贊善各
四兼檢討主簿各一錄事各二正字各二○定遠平寇大將軍安
親王岳樂等奏江西巡撫白色純病故江西布政使佟國楨甚得
民心請將佟國楨升補巡撫得旨佟國楨升授江西巡撫郎廷相
令其候補○己亥福建巡撫楊熙奏九月二十九日臣同少傅公
尙之信等領兵入閩克鮮水關招撫偽參將葛習猷等十月初六

日於永定縣擊敗賊眾復縣城得旨嘉獎下部議敘○定遠平寇大將軍安親王岳樂奏吳逆聞臣進取長沙必固守要害非綠旗兵無以搜其險阻非紅衣礮不能破其營壘提督趙國祚久在行間熟練火器兼統綠旗兵三千屯壘都督陳平有兵二千乞俱令隨臣進討其廣東送來紅衣礮甚重路險難致西洋礮輕利便於運動乞發二十具爲攻勦之用 上諭勦滅逆賊平定湖南俱賴安親王練習宿將及精兵火器俱不可闕提督趙國祚都督陳平並所屬官兵悉依安親王所請南懷仁所造火礮著官兵照數送至江西轉運安親王軍前王不必待礮到始行亟由吉安或袁州進發○以陝西提督陳福勤勞邊疆忠貞甚著其弟刑部主事陳壽從優以光祿寺少卿鴻臚寺少卿用○辛丑諭刑部尙書艾元徵罪人久繫朕心不忍今時值嚴冬應速行審結○靖逆將軍甘

肅提督侯張勇等奏西甯鎮臣王進寶出首吳逆僞文僞書得旨
逆賊吳三桂差人投遞僞文僞書鎮臣王進寶卽行舉首忠貞可
嘉下部議敘○壬寅廣東廣西總督金光祖奏叛鎮馬雄同滇賊
王宏勳等至高州高雷廉叛兵合計約有十萬臣率兵深入高州
恐逆賊孫延齡乘隙犯梧尙可喜無兵可調乞添發大兵前來應
援 上諭逆賊率眾來犯廣東不可不速遣大兵大將軍簡親王
於畱守江西兵內卽選擇精銳每佐領二名命才能夸蘭大率之
速赴廣東聽平南親王尙可喜將軍舒恕總督金光祖商酌調遣
餘兵仍著舒恕統轄江西兵旣發往廣東山東兗州蒙古兵六百
名令署副都統科爾科代統之卽赴江甯科爾科旣到江甯江
甯所有烏喇盛京兵一千令副都統尼滿雅秦揚古代統之卽赴
江西更發禁旅每佐領兵二名一半赴江甯同蒙古兵六百名俱

聽將軍哈爾哈齊統轄以其半赴山東同原駐蒙古兵聽將軍布

顏統轄○以吳努春爲內閣學士

由太常寺卿遷

○甲辰定遠平寇大將

軍安親王岳樂等奏將軍希爾根額楚等剿殺江西浮梁貴溪等

縣賊眾恢復城池招撫僞官張輔聖等二百七十餘員兵三千三

百七十八名得旨嘉獎下部議敘○廣東廣西總督金光祖奏九

月二十七日羅定副將吳陞等於黃坡嶺殺敗逆賊下部議敘○

丙午以喇沙里爲翰林院掌院學士兼禮部侍郎

由翰林院侍讀學士遷

○

戊申奉命大將軍康親王傑書等奏十月初七日貝子傅喇塔等

攻温州敗賊於南江十月初九日副都統馬哈達三等台吉察渾

等敗賊於石塘僞副將朱起龍自温州投誠下部議敘○己酉以

姚啓聖爲江西布政使

由糧道遷

○壬子吏部議覆給事中劉沛先奏

直隸各省行取知縣督撫薦膺有卓異有薦舉有才能列爲三項

而京官考選獨無差等請於各衙門咨送時論俸之中分別等第密咨開送應如所奏嗣後科道員缺行取在內五部主事中行平博俱令該衙門堂官於俸滿官員內開送賢能之官如濫送者照督撫濫舉之例處分從之

十二月甲寅朔浙江總督李之芳奏招撫溫台等處賊寇偽總兵等二百餘員兵四千餘名救出難民十一萬餘口下部議敘○乙卯定遠平寇大將軍安親王岳樂等奏江西文武官弁招撫偽官六十七員兵丁家口共四千四百餘名下部議敘○戊午定西大將軍貝勒董額奏官兵攻平涼克取第一關廂去城三里許對南山屯營欲前進薄城因溝深地險難以下壘城未能速下 上諭逆賊久踞平涼皆因有糧可恃若斷其餉道則賊自窮困平涼城北通固原要路大將軍貝勒等宜速斷截以困斃之○庚申 上

奉 太皇太后幸南苑○諭大學士圖海等前遣多諾納布總理湖廣大兵糧餉節省浮冒招集殘黎責任綦重伊等宜仰副朕責成之意實心料理竣事而還乃未著有成效希圖規避奏請回京順承郡王勒爾錦等屢奏多諾等任極重大不宜發回前欲遣納布往荊州貝勒尙善亦屢奏糧餉事重不宜發往今乃忽稱無事伊等竟自回京是何意見阿範參贊簡親王軍務不思效力託言有疾來京俱屬越例著議政王大臣等察議尋議多諾應革去左都御史佐領本身所得世職並解所襲伊父拜他喇布勒哈番又一拖沙喇哈番悉令應襲人承襲納布應革去侍郎佐領勒爾錦尙善等前後奏請乖錯事平議罪阿範係候補侍郎二等阿達哈哈番俱應革去發江西軍前充伍議上命畱多諾佐領及伊父世職畱納布佐領餘依議○壬戌諭在荊岳大將軍等今大將軍安

親王由江西進取長沙爾等應發兵夾勦前者荊州添設綠旗兵及烏槍兵甚多貝勒察尼又率兵赴彝陵已數月矣尙未奏捷順承郡王勒爾錦等或分見在荊州兵或調可緩地方之兵速發長沙儻彝陵賊未能卽破察尼等應量留官兵於彝陵遣餘兵與荊州兵合或由雲溪驛或由別路酌量議定並量度安親王將抵長沙之期彼此關會協力齊進斷賊糧道夾攻長沙貝勒尙善亦分遣官兵與荊州彝陵兵同往尙善仍作攻取岳州之勢移兵偏之如機有可取卽取岳州爾等率大兵駐荊岳將及二載糧費師老並未得尺寸之地坐失事機罪不勝數今安親王進攻長沙若不發兵夾勦俾賊偵知荆岳按兵不動死守長沙要路則爾等貽誤之罪更大矣其遣發之兵誰可統率著公議遣往無分彼此同心協濟務期有裨國事○定遠平寇大將軍安親王岳樂奏僞總

兵張存遣使來言閩逆軍餉匱乏恣意剝削軍士逃亡百姓怨讟張存有兵八千人屯於順昌不聽耿逆調遣又僞總兵羅元生等統兵固守其地邵武總兵彭世勳雖降逆而按兵不動此皆耿逆之內患也若大兵自江西進閩伊等卽爲內應但臣見赴長沙剋期進發伏乞 睿鑒詳度無失事機 上諭招徠逆賊克取福建

令大將軍簡親王副將軍希爾根將軍額楚總督董衛國等相機以行至於進攻長沙勦滅吳逆惟王是賴但恐逆賊覘知我兵進取長沙固守袁吉阻我兵行王或揚言取道別路出其不意或合兵前進或兵分數道在王必有定見其籌畫萬全速行之○癸亥上奉 太皇太后還宮○丙寅立 皇子允禔爲皇太子○丁卯 上御太和殿受朝賀頒詔加恩天下赦殊死以下○戊辰轉郭四海爲兵部左侍郎以吳努春爲兵部右侍郎由內閣學士遷○辛未

江西總督董衛國奏左營遊擊周球等擊賊於贛縣大敗之干總張能把總郭虎俱戰歿下部議敘○壬申以介山爲左都御史

部左侍郎

調郭四海爲督捕左侍郎

由兵部調

○癸酉平南親王尙可齊

奏逆賊劉進忠句引鄭錦入潮州祖澤清句引馬雄至高州雷廉失守粵東十郡竟失其四將軍舒恕總督金光祖退回肇慶事勢危急聞和碩安親王由袁州進攻長沙恐時當春水汎溢且吳逆全力集於常澧守禦必堅請以公倭赫之兵仍駐袁州安親王赴廣東勦賊 上諭吳三桂未滅故諸賊得以猖狂今安親王進取湖南則粵東之勢自緩若由粵東進兵則道路迂回稽延時日前以粵東危急已命大將軍簡親王發每佐領甲兵二名馳赴應援此兵到日平南親王與將軍舒恕等公議固守疆圉剪除逆賊又諭簡親王喇布前以粵東告急命爾發每佐領甲兵二名速赴應

援至今尙未遣發殊誤事機今再撥每佐領護軍一名並前所發兵或副都統額赫納或署副都統宗室巴爾堪令一人爲將軍統之速赴廣東毋得仍前遲滯以誤事機○乙亥孟南靖寇大將軍順承郡王勒爾錦奏臣等若不速行渡江前進必致餉匱師老馬匹疲乏細籌之若得滿兵每佐領十名則戰守自足今調集各路兵合在荆之兵每佐領得四名半乞再發禁旅每佐領五名便可渡江剿賊 上責之曰方吳三桂之初叛也卽命大將軍順承郡王勒爾錦等率精兵往討賊來甚速其力必疲勒爾錦等不乘此時擊之但頓兵荆州故賊得以其暇據有湖南厥後大兵齊集又不克期渡江賊於是得固守要害犯我彝陵揆厥所由實因勒爾錦及參贊巴爾布伊爾度齊碩岱等耽延時日不急討賊故逆賊滋蔓耿精忠孫延齡相繼叛亂前因欲渡江擊賊請發官兵已添

發滿洲蒙古兵數千綠旗兵一萬而究未得湖南尺寸地今復請

兵豈果欲速滅賊寇亦不過冀免逗留耳巴爾布伊爾度齊碩岱

等著俱解參贊畱任效力贖罪○丙子以察庫爲內閣學士

由翰林院

侍讀學士遷

○丁丑先是

上諭議政王大臣等秦省要區叛賊王輔

臣亟宜勦滅著提督陳福整頓標兵或併力克取固原或會同大

將軍貝勒董額等進攻平涼同副都統恰塔商酌以行至是陳福

奏固原有賊萬餘若舍此竟趨平涼恐固原賊出斷我糧道應俟

賊勢少衰進偪固原量畱官兵圍困其城臣乃率兵赴平涼方無

後慮 上諭陳福身在地方熟悉賊情著如所請速取固原以遏

賊勢○調伊桑阿爲戶部右侍郎

由刑部調

○轉吳努春爲兵部左侍

郎調郭丕爲兵部右侍郎

由刑部調

○癸未陝西臨鞏總兵官王進寶

振武將軍佛尼勒靖逆將軍侯張勇等奏會勦逆寇於西河縣三

戰三敗之斬獲甚眾下部議敘○是月免河南陝州靈寶閿鄉旱災額賦有差○是歲朝鮮入貢○人丁戶口一千六百七萬五千五百五十二田地山蕩畦地五百七萬三千四百五十八頃六十三畝徵銀二千六十三萬五千二百七兩六錢有奇米豆麥五百二十八萬三千四百五十二石七斗有奇草二百二十五萬三千八百二十七引徵課銀二百二十九萬三千五百八十三兩有奇鑄錢二萬九千三百四十七萬六千六百有奇